

27'ê Cozerdan (17'ê Hezîran)'a isal, 30 sal bi ser temenê Radyo Dengê Kurdistanana Îranê de derbas dibe. Xebata pir ji şanazî a vê dezgehê tu gumanek ji rastbêjî û heqbêjiyê ji guhdarên xwe heta neyaran re ji nehiştiye û karnameya rûsor a xwe bi şanazî û deskevîten pir mezin xemlaniye û her ku diçe, guhdarên xwe evîndartir dike. Piroz be 30'min salvegera xebata bêrawestiyana a wî dengê zelal û heqbêjî.

# Bazneya Dorpêçên Li Dijî Îranê Tengtir Dibe



## Tehrîmên Nû, Diyariya Civaka Cîhanî Bi Rejîma Îranê

Piştî wê ku Konseya Ewlekar ya NY, biryarnamaya 1929 li dor tehrîmên gera 4'mîn li dijî Îranê pesend kir, her yek ji Amerîka û Yekîtiya Ewropa, Usturaliya, Kureya Başûr û Japonê jî bi cuda tehrîm xistine ser Îranê. Ew li ser vê baweriyê ye ku divê tehrîm bi qasekê dijwar û giran bin ku Komara Îslamî bi çokde bine û neçar bi devberdan ji pirogramên xwe bike, YE'ê tehrîm xiste ser seneta neft û gaza Îranê. Kongireya Amerîkayê jî Wezîrê Berevanî û Fermanderê Besic û herweha sîstema gemîvanî şirketên girîdayî sipahê xiste nav lîsteya tehrîmên xwe. Ji aliyek din ve jî welatên Qezaxîstan û Turkmenîstanê rîya şandina nifta xwe, guherand û niha rîya şandina nifta wan du welatan li bendera Nuforosîk a Rosiyê li beravên behra Reş de ye. Ew guherîne seba nîgeraniya tehrîmên Şewra Ewlekar li ser abûriya Îranê bûye.

## Rejîma Îranê Rohilata Navîn Ber Bi Şer Dibe



Gemiyên ku Îranê bi navê "alîkariyê", lê bi armanca şikandina dorpêçên ser Xezê, afirandina aloziyan û kurtir kirina kirizana ber bi xezeyê şandin, dikare bibê sedema şerekî mezin di navbera Îsraîl û Îranê de. Îsraîlê da zanîn ku bi tu awayî rê nade van gemiyan. Çunku renga weke her car Îran alîkariyên loceştîkî û silaha ji Hamasê re bişîne. Îranê jî ragihand: Êrîşa Îsraîlê bo ser gemiyan, wateya îlan kirina şer di navbera Îran û Îsraîl digehîne.

## Yêkêtiya Cîhanî Li Hember Îranê De



56 welatên Cîhanê, nerazîbûna xwe bi nisbet bînpêkirina mafê Mirov li yek sala derbasbûyî di daxuyaniyekê şermezar kirinê de nişan dan. Nûnerê Norwejê bi nûneratiya wan welatan li civîna Şewra Mafê Mirov li Jinêvê de Komara Îslamî mehkûm kir û daxwaza şandina bilez û şandeya mafê mirov bo Îranê kir. Komara Îslamî heya niha 30 car ji aliyê NY ve bona pêpêskirina mafê mirov hatiye şermezar kirin.

### Rûpel 2



Peyama Pirozbahiya  
Sekreterê Giştî Ê PDKÎ...

### Rûpel 4

Hevpeyvînek  
Taybet Bi  
Birêz  
Mihemed  
Nezîf  
Qadirî...



Hevpeyvîn: Agirî

### Rûpel 6

Di 80'min  
Salvegera  
Şehîdkirina  
Bavê...



Selîm Zencîrî

### Rûpel 8

30 Sal  
Xebat û  
Tekoşîna  
Bêrawestan



Şehab Xalidî

### Rûpel 11

Zimanê Me  
Nasnameya  
Me Ye



Mecîd Cinîkanlo

## Peyama Pîrozbahîya Sekreterê Giştî Ê PDKÎ

### Bi Hilkevta Dawîhatina Sêyemîn Kongireya Yekîtiya Nîştimanî A Kurdistanê

Rêzdar Mam Celal, Sekreterê Giştî ê Yekîti Nîştimanî a Kurdistanê!

Tevî silav û hurmet!

Bi hilkevta dawî hatina serkevtiyane a sêyemîn Kongireya Yekîtiyê û hîlbijartina dûbare a cenabê te wek Sekreterê Giştî, ez pîrozbahiyên xwe û rêberiya PDKÎ pêşkêşî cenabê te û hemû endamên rêberiya Yekîtiyê dikim.

Hevîdarim peywendiyên dostane yê navbera Yekîti û PDKÎ xurt, berfirehtir û di pêşdeçûnê de bin.

**Rêz û hurmeta dubare  
PDKÎ  
Sekreterê Giştî  
Mistefa Hicrî  
19'ê Hezîrana 2010 a Zayînî  
29'ê Cozerdana 1389 a Rojî**



## Daxuyaniya Deftera Siyasî, Derheq Hawrîdanek Ji Birêveçûna 10'mîn Gera Maşkanêya Hilbijartinên Serkomariya Îranê û Encamên Wê

**R**ejîma Komara Îslamî a Îranê salekê berî niha û di roja 22'ê Cozerdana 1388'ê Rojî de, 10'mîn gera

maşkanê ya hilbijartina Serokomariyê birêve bir.

Di beriyê de Şewra Nobedar di nav 1400 kesên ku navnivîsî kiribûn, tenê kêrahtîbûna 4 ji wan pesend kir û yê din red kirin. Ew 4 kes ku nas kirîtirîn moreyên rejîma Komara Îslamî bûn, pêkhatibûn ji: Mehmed Ehmedînejad, Serokomarê wê demê, Mîr Husên Mûsewî ku di dema jiyana Xumênî û şerê Îran û Îraqê de, 8 salan Serokê Hikûmetê bû, Mêhdî Kerobî ku di dema bi nav zêrin! a Reformxwazan de Serokê Perlemantoyê bû û Muhsin Rezayî jî ku pêtir ji 10 salan fermanderê giştî yê Spaha Pasdaran bû.

Partiya Demokrat a Kurdistanê Îranê di daxuyaniyekê de seba wê ku rejîm îzna wê bi xelkê nade ku heta di nav wan 4 kesan de jî kesê dilxwazê xwe hilbijêrin û berî hilbijartinê, Serokomarê pêşerojê hatiye diyarîkirin û tu giringî û pûteyek bi dengê xelkê nahê dayîn û tu nîşaneyek ji hilbijartinekê ku aliyê kêr li gel standardên hilbijartinekê azad de li hev bê, weke hemû hilbijartinên bi wî awayî di derbazbûyê de ku ew tişt nayê xuyakirin, ew hilbijartin baykot kir. Lê rejîmê weke herdem bi pîlanên xwe û yek ji wan jî birêvebirina çend nîqaş "munazirê"ên televizyonî di navbera wan bi nav berbijaran de, karî hejmarek zaf ji xelkê Îranê ji bilî Kurdistanê, bikşîne ser sindûqên dengdanê.

Her çend di demjimêrên destpêkî ên piştî hilbijartinê de, Mûsewî û aligirên wan bas ji serkevtina xwe dikirin û piropagende ên berçav birêxistin, lê piştê bi awayek fermî dezgehên çavdêr bi ser wê maşkanê de, her wek di şîroveyên Partiya Demokra a Kurdistanê Îranê de bas jê hatibû kirin, berbijêrê cihê pesenda Wîlayeta Feqîh, anku Mehmed Ehmedînejad bo gerek din a Serokomariyê bi berbijêrê serkevtî ragihandin.

Bi ragihandina encamên wê hilbijartinê, li Tehran û çend bajarên din neraziyên encama hilbijartinan derketin ser şeqaman û bi piştevanî ji Mûsewî li dijî encama wê hilbijartinê dirûşm dan û pirsîyar ji çarenivîsa

dengên xwe kirin û daxwaza hilweşandina encama wê hilbijartinê û hilbijartinek ji nû ve kirin. Bi giştî berbijêrên reformxwaz ew hilbijartine bi kûdeta nav birin. Lê piştî çend rojan nerazibûn û xwenîşandan ji aliyê xelkê ve berî ragihandina fermî ya encama hilbijartinê ji aliyê Şewra Nobedar ve serencam rêberê Komara Îslamî di civînek



giştî de carek din piştevaniya xwe ji berbijêrê dilxwazê xwe, Mehmed Ehmedînejad nîşan da û ew hilbijartin bi serkevtinek din ji bo rejîma xwe da zanîn. Piştî wê helwesta rêberê Komara Îslamî a Îranê, berbijarên dîrxistî ên reformxwaz û aligirên wan bi nav Tevergera Kesk dirêjî bi nerazibûna xwe dan û rejîmê jî li hember wan xwenîşandan de siyaseta tepeserî, givaş û tund û tûjiyê şopand û hejmarek berbiçav ji xwenîşanderan rewaneyê girtîgehên bixof yê xwe kir û hovane hatin azar û îşkencedan. Ew siyaseta dijî mirovî a rejîmê li seranserê cihanê de deng veda û civaka navnetewî bi taybetî kom û komelên mirovdost hejandin û bûye mijara ragihandinên navnetewî û mehkûmkirina Komara Îslamî a Îranê ji aliyê wan ve. Ew kiryarên dijî mirovî ku hesta hemû însanên azadîxwaz û mafxwaz birîndar kiribûn, bûye sebebê wê yekê ku qatên civakê bi dirûşmên xwe ve tevî wê nerazibûnê bibin. Tevî wê ku rêberên Tevergera Kesk dijî dirûşmên pêkhatîkên bûn û daxwaziye wan di çarçoveya dest ji kar vekîşandina

Ehmedînejad û hin ji daxwazên din weke birêveçûna Yasaya Bîngehîn a Komara Îslamî bûn, lê di dirêjîya wan xwenîşandan û meşên nerazibûnê de û di mehên şûndatir de, xelkê azadîxwaz yê beşdar û xwenîşandan de berevajî xwast û daxwaziye rêberên Tevergera Kesk, dirûşmên xwe arasteyî Welîyê Feqîh, Yasaya Bîngehîn û li dawiyê de Komara Îslamî bi hemû pêkhatiya xwe ve kirin. Ew dirûşmên radîkal, lertzî xiste peykera Komara Îslamî û rêberên wê, lewma gelek hovane dest dane tepeserî û êrîşên ser xwenîşanderan û şehîdkirina keç û xortên azadîxwaz ên welatê me ku di nava wan şehîdan de çend kes ji keç û xortên azadîxwaz ên Kurd jî hebûn.

Di wê qonaxa hestyar de, Partiya Demokrat a Kurdistanê Îranê di ragihandinek fermî de piştevanî ji bizava azadîxwazane ya xelkê mafxwarî û maf pêpeskirîyê welatê me kir, li gel malbatên serbilind ên şehîdan hevderdî kir, daxwaz ji kom û komelên mirovdost kir ku ji bo parastina canê girtiyên siyasî bi hewara wan de bihên û ragihand ew bizave di demekê de dikare bi armançên xwe bigîje ku bo hîloşîna rejîmê xebatê bike û li ser pêşdebirina piroseya demokrasiyê û dabînkirina mafên netewî ên gelên Îranê pêdagir be. Çunku di çarçoveya wê sistemê de, tu guhertinek bi qazanca xelkê nahê kirin. Di vê derheqê de, Partiya Demokrat a Kurdistanê Îranê di Pîlînomaya Xermanana 1388'ê Rojî de, dawîn analîz û şîrove li ser rewşa siyasî a Îran û Kurdistanê kir û di wê şîroveyê de, ku siyaseta û helwestên rêberên Tevergera Kesk berevajî xwast û daxwaziye bizava rizgarîxwaziya welatê me bo rizgarbûn ji destê dîktatorî û kevnepereştîyê de bû û sedema tevînebûna netewên mafpêpeskirî û tex û qatên din ên civakê ku heya wê demê tevî bizavên nerazibûnê nebibûn, vegerande ser wan kêmasiyan. Ji wan giringtir jî, nebûna rêberiyek demokrat û biryarder di wê bizava nerazibûnê de, xalek din a lawaz, diyar û berçav bû. Piştî wê şîroveya siyasî, Pîlînomê biryar stand ku her wek siyaseta xwe ya berê, em dê piştevanî ji bizava sekolar û pêşkevtî ya welatê xwe bikin ku armanca wê, guhertinek bîngehîn, hîloşîna rejîma Komara Îslamî û damezirandina sistemeke demokratîk û federalî be û mil bi milê hêzên siyasî ên Îranê,

emê dirêjî bi xebat û tekoşîna xwe bidin û bi geşekirin û pêşveçûna wê xebata sîvil û gelî, û beritirkirina qada tekoşînê bê dudilî û rarayî bûnê heya gihîştin bi armançên wê, emê berdemawî bin.

Piştî derbazbûna salekê bi ser maşkanêya hilbijartina gera 10'mîn a Serkomariyê de, rejîma Komara Îslamî a Îranê sermestê serkevîna pîlana xwe ye û renga di wê xeyalê de be ku bi kuştin, girtin, îşkencê û ... kariye xelkê nerazî bêdeng bike. Lê gellek diyarde nîşan didin ku hêza berxwedana xelkê li hember rejîma pîlan û tepeserkar de bihêztir û zindîtir ji salek berî niha ye û di rewşek libar de dê bihêztir û pir givaştir ji derbazbûyî serî hilde, berevajî jî, rejîm di vê midehê de pêtir ji hemû demekê bi destê ew kirîzên navxweyî û derveyî ku di yek sala borî û salên berê de afirandiye, bêcare maye û pêşerojek pir xerabtir ji niha jî li bendê ye.

Ev tevgerê jî bona wê ku di vê serhildanê de tûşî wan lawazî û kêmasiyan nebe, zûtir bigîje encamê û têçû û baca serkevîna û dema wê jî kêmtir be, hewce ye hemû xelkê Îranê û bi taybetî rêxistinên siyasî bi hûrbîni û bi çavê rexnegirane ve mîzevî bizava yek sala derbazbûyî bikin. Di vê derheqê de, Partiya Demokrat a Kurdistana Îranê li ser vê bawerê ye ku:

**1:** Beşdariya xelkê di dawîn hilbijartina Serokomariyê de gavek şaş bû, çunku encamên wê bi qazanca rejîmê bidawî hat. Bêguman, beşdariya berbiçav a xelkê di her hilbijartinekê de bi yek ji nîşaneyên rewatî û meşrûiyeta rejîmê tê hesibandin, jiber wê yekê jî di wê demê ve heya niha bi sedan car desthilatdarên rejîma Komara Îslamî ser

beşdarî li hember xelkê cîhanê û xelkê nerazî yê Îranê de bikar aniye û bi nîşana pesendbûna hikûmeta xwe di nav piraniya xelkê de nîşan daye. Lewma hewce ye di hilbijartinê pêşerojê de jî dema ku hest bi wê yekê bikin dengê wan tu buha û giringiyek di encama hilbijartinê de nine, nikarin deng bi berbijarê cihê pesenda xwe bidin û bi kurtî kêmtirîn nîşaneyên standarda hilbijartinek azad li holê de nine, bila weke xebatek sîvil mifahê jê bistînin û beşdariyê têde nekin. Ji bo rejîma Komara Îslamî gelek siruştî ye dema hest bi wê yekê bike ku di hemû rewşekê de xelkê rû ji sindûqên dengdanê dikin, nûnerê dilxwazê xwe ji sindûqan de derxîne.

**2:** Hewl û tekoşîna 10 saliya reformxwazan serbarê nîşandana wefadariya bi rejîmê bi taybetî di yeksala derbasbûyî de, carek din ew rastî eyan kir ku di vê rejîmê de îmkana reformê tune ye. Lewma pêwîste êdî xweliyê nekin nav çavê xelkê, wan ji rê dernexin û xwîna azadixwazên Îranê di wê riyê de bi xesar nedin. Çunku rejîm li midehê desthilatdariya neguher ya dehan salî a xwe li piratîk de eyan kiriye ku bidestxistina azadî û demokrasiyê ku xwasta xelkê Îranê ye, bi hebûna wê rejîmê bidest nahê û bo gihîştin bi wê xwastika rewşa pêwîst e hemû hêz û şiyana di rîya hîloşandina rejîmê de bihên bikar anîn.

**3:** Nebûna bernameke rohn, yek ji xalên lawaz ên herî berbiçav a Bizava Kesk bû ku heya niha jî pêve xuya ye, ligel wê yekê ku rêberên naskirî ên wê bizavê di her boneyekê de axaftin e û xelkê jî di şeqaman de dirûşm qîrandine, lê tu yek ji wan bername ninin û tu bizavêk jî bi bê bername ser nakeve.

**4:** Ji bo guherîna rejîmê û anîne serkar a

hikûmetek ku xwast û daxwazên tex û qatên civakê dabîn bike, rêberiyek bîyarder û demokrat pêwîst e. Rêberiyek ku berpirs û rexnehilgir be û ligor pêşveçûna bizavê bikare rê û cihên guncaw bo dirêjîpêdan bi xebatê diyarî bike, çavniheriya rizgarkirina xelkê ji destê dîktatoriya rejîmê ji kesên ku rojane li ser baweriya xwe bi Komara Îslamî pêdagirin, bê bîngêh e, eve jî yek ji xalên lawaz yê Bizava Kesk bûye ku heya niha jî bi wî derdî dinala.

**5:** Dîcîh demana bizavê tenê di şeweyek ji xebata sîvil - xwenîşandan - û mifahwerneqirtin ji xebatên din ên bi wî awayî, xincî wê yekê ku hêdî hêdî xelkê mandî û westiyayî dike, hêzên tepeserkar ên rejîmê jî bi amadeyiya tewawê de givaşan bixin ser wê xebatê û pîlanan bo tepeserkirina wê dabirêjin, lê guherîna zû bi zû ya şîweya xebata guncaw dê hêzên rejîmê bixapîne. Bo minak em dikarin amaje bi xebata gîrewê û mangirtina neçûne serkar di Kurdistana de bikin ku di roja 23'ê Banemera 1389'ê Rojî de piştî îdama 5 tîkoşerên siyasî birêve çû.

Di dawiyê de, Partiya Demokrat a Kurdistana Îranê bo gihîştin bi wê armanca siyasî, carek din tekez û pêdagirî li ser hevkarî û hevxbatî li gel hemû hêzên siyasî û pêşkevînxwazên Îranê dike û vê hevkarîyê bo hîloşîna Komara Îslamî a Îranê û bi mifahstandin ji hemû metod û şewazên xebatê bi hewcehiyek siyasî dizane.

**Partiya Demokrat a Kurdistana Îranê  
Deftera Siyasî  
Cozerdana 1389'ê Rojî  
Hezîrana 2010'ê Zayînî**

## Daxuyaniya Çend Part û Rêxistinên Siyasî Ên Kurdistana Li Hember Topbarankirina Sînorên Herêma Kurdistana

**H** ewwelatîyên rêzdar!  
Rêxistinên navnetewî ên aşîxwaz û parêzerên mafên

Mirovan!

Her wek haydarin, hêzên rejîma Komara Îslamî a Îranê, piştî heyamekî zêde topbaran û bombarana Sînorên Herêma Kurdistana niha heyamî çend rojane ku berevajîya hemû rê û cihên navnetewî, Sînorên Herêma Kurdistana de vera Hacı Omeran û bilindahiya Çiyayê Qendîlê bezandîye û li gor nûçeyên ragihandinên giştî, hêzên rejîma Îramê bi qasê çend "KM" ketine nav axa Herêma Kurdistana û bêrehmane gundên wan li deveran topbaran û bombaran dike û zirar û xesarekî zêde a canî û madî bi xelkê wan deveran gihandiye. Her bi vê sedemê bi hezaran kes ji akinciyên deverên navhatî bo parastina canê xwe, mal û halê xwe bi cî hiştine û ber bi deverên din ên Herêma Kurdistana derbider bûne.

Hemû aliyek haydar e ku Komara Îslamî a Îranê bo tevlihevkirina raya giştî a navnetewî di derheq pirogirama çeka navikî û destdirêjîyên xwe bo ser mafên Miroyan û darvekirina biKom a neyarên siyasetên xwe li hûndirê Îranê her carê Şanoyekî li dardixê û pirogiramekî taybet pêktîne û di vî warî de wek desthilatekî kirîz afir û



cinayetkar bo hemû raya giştî hatiye naskirin.

Li aliyekî din ve, rejîma Komara Îslamî a Îranê cihgîrbûna hikûmeta Herêma Kurdistana û berfireh bûna Pêvajoya demokrasiyê û tenahiya di vê herêmê de wek mezintirîn gef bo ser xwe dizane. Lewma di destpêka avabûna hikûmeta Herêma Kurdistana, berdemaw hewil daye dest têwerdan li nav kar û barên ve Herêmê bike û di vî warî de xwe ji tu hewlekê neparastîye.

Lê hemû kiryarên han, vê rastiye

naguhirin ku kiryarên Komara Îslamî a Îranê bervajîya hemû urf û yasayekî navnetewî û rêzgirtin ji serwerî û serbixweyiya welatên din e û ev êrîşa bo ser deverên Herêma Kurdistana bi êskere bînpêkirina serweriya welatê Iraqê û Herêma Kurdistana ye.

Lewma em wek komîteya hevkarî a hêzên siyasî ên kurd û kurdistana tevî şermazarkirina vê êrîşê bo ser deverên Herêma kurdistana, daxwaz ji hemû raya giştî a civaka navnetewî û li serwey hemûyan jî rêxistina Netewên Yekgirtî dikin ku yekdeng û hevgerî bi dijî wan kiryarên Komara Îslamî a Îranê bisekinin û helwêstekî jêhatî li xwe nîşan bidin.

Komîteya Hevkarî a hêzên siyasî ên kurd û kurdistana:

- 1- PDK
- 2- Yekêti Nîştîmanî a Kurdisatana
- 3- PDKÎ
- 4- Komeleya Şoreşgirên Zehmetkêş ên Kurdistana Îranê
- 5- Partiya Susyalîsta Kurdistana (Bakûr)
- 6- Partiya Siyasî a Kurdistana
- 7- Partiya Yekêti a Demokrata Kurd li Sûriye (Yeketi)
- 8- Partiya Zehmetkêşên Kurdistana
- 9- Partiya Kurdên Feylî

# Hevpeyvînek Taybet Bi Birêz Mihemed Nezîf Qadirî, Endamê Deftera Siyasî a PDK Îranê

**Hevpeyvîn: Agirî**

**X**wendevanên hêja!  
Derheq bûyerên siyasî ên pêwendîdar bi Îranê li vê dawiyê de û herweha pirsên

navxweyî yên wî welatî me bi derfet zanî ku ji nêzik ve ra û helwesta PDKî ji zarê birêz Mihemed Nezîf Qadirî, endamê Deftera Siyasî yê PDK Îranê werbigirin ku li jêr de dikewe ber çavên we hêjayan.

**Di çend rojên derbasbûyî de me dît ku Şêwra Ewlelar ya NY<sup>e</sup> biryarnameya 4'mîn ya dorpêçan dijî Komara Îslamî pesend kir. Cudahiya vê biryarnamê bi yê berê çîye?**

Baskirin li ser mesela navikî a Îranê û helwestên saziya Navnetewî a Vejena Navikî û ew hewlên ku di çend salên derbasbûyî de bi nisbet qanîkirina Komara Îslamî ji bo destberdan ji mehandina Uraniyomê, sekinandina programên navikî û herweha çûna dosyaya Îranê bo Civata Ewlekar ya rêxistina Netewên Yekbûyî û bi taybetî ew pêdagiriya welatên 5 +1, dosyaya etomî a Îranê gihîjandê xalekê ku civaka navnetewî û endamên Şêwra Ewlekar ya NY<sup>e</sup> bi awayeke pir micidtir wê pirsê bişopînin û biryar û helwestên jêhat li dor serhişkiyên Komara Îslamî û guhnedana wê bi hewlên diplomatîk, bigirne pêşberî xwe. Giringiya biryarnameya 4'mîn a Şêwra Ewlekar de ku bi 12 dengên erê, 2 dengên na û 1 dengê bêalî hat pesendkirin, vedigere bo ser çend xalên esasî. Yekem, li helwesta siyasî a welatên Civata Ewlekar û Almanya de dengê yekgirtitir yan hevahengiyêke siyasî a pêtir li gor biryarnamê berê hebû. Bi taybetî yek ji meselên esasî yên wê biryarnamê ev e ku îdareya Obama û Wezareta Karê Derve ya Obama karîni bi awayek li gor çavniheriya xwe bi Çîn û Rûsiyayê ku berê zaf li ser tehrîmên li dijî Komara Îslamî micid nebûn yan bi awayekê asteng bûn li ser rîya biryarên wê Civatê, bilivîn. Herweha gelek caran jî seba nerazîtiya wan, ew biryar dihatin paşxistin yan civîn bêencam diman, lê li civîna vê carê de hevahengî û hevretîya Çîn û Rûsiyê bi Amerîka û endamên din ên Şêwra Ewlekar de berçavtir bû, Dûyem, nerazîtiya dewletên Tirkiye û Berazîlê bû ku li meha derbasbûyî de hewleke diplomatîk ji aliyê wan ve bona razîkirina Îranê hat encam dayîn û di çarçoveya wan pêşniyazên ku saziya Navnetewî ya Vejena Navikî berê nişan dabûn, Îranê bigihîjînin qenaetê ku daxwazên civaka navnetewî bipejirîne.

Li gel wê yekê ku Îranê di rûyekî de hin tişt bona çewaşekirina meselên siyasî di wî warî de û herweha bona bidestxistina demêk pêtir pejiwand, lê di kiryar de ew helweste û herweha ew mebesta ku Komara Îslamî di wê civînê de dişopand, pêtir xawkirina welatên 5+1 û herweha ew hewlên diplomatîk bûn ku di çend mehên derbasbûyî de Amerîka hewil jêre dabû ku bikare bi dengê yekgirtî biryarek micid li ser Komara Îslamî li dor çeka navikî û tehrîmên pêtir li ser Îranê bidin.

Xalek bihêz a din di rastî de xwendin û

têgihîştina wê mebesta riyakariyane ya Komara Îslamî bû ku di civîna Tehranê de şopand, jiber wê yekê, wan karî di wê meselê de destê komara Îslamî rû bikin û siyasatên xwe bona perawêz xistin û terîkxistina rejîma Komara Îslamî di asta navnetewî de dirêjî pê bidin. Ji aliyê din ve jî ew bawer in ku rejîma Komara Îslamî ewlehî û aramiya navnetewî û deverê tehdîd dike û armançek aştxwazane li pişt wê piroseyê nine. Lewma ji bo hemûyan eyan bûye ku rejîma Komara Îslamî rejîmek nine ku bixwaze ji wê pirojeya Etomî mifahên aştxwazane werbigre û di hewla bidestxistina çeka Etomî de ye.

**Bi bawera we ew biryarnamê çiqas dikare pêşî ji bernamê navikî yê Îranê bigre?**

Komara Îslamî biryara xwe daye ku dixwaze bigihîje çeka navikî, lê ew givaşên navnetewî û deverê û herweha pesend kirina wan biryarnamayan rege di warê siyasî û di warê pêgeha diplomatîka Îranê di asta navnetewî de bibe zext, lê eva jî siroştê rejîmên totalîter e ku siyaseta çavmiqandîni ji yasa û rêsayên navnetewî digrin pêşberî xwe û dirêjî bi wan siyasatan didin ku armançên taybetî ên wan in ku gihîştin bi çekên navikî ye. Bona wê ku pêgeha leşkirî a xwe û balansa hêzê bi qazanca xwe biguherin. Çunku siroştê rejîmên dîktator, kevneperest û serberedayî, diyalog yan rêçareyên siyasî bona destberdan ji siyasatên dijî insanî yên wan nine û ew siyasatên ku girtine ber xwe bo gihîştin bi çeka etomî, bi bawera min dê her têde berdewam bin.

**Ew dijkirarên Tirkiyê di peywendî li gel biryarnamê wê carê û herweha nizîkbûna li gel Îranê, bi raya we bo çî vedigere? Gelo bûna pirsê hevpar weke pirsê Kurd di Îran û Tirkiyê de sebaba sereke ya nizîkbûna wê carê nagehine?**

Ewa ku helwesta Tirkiyê çî armançeke siyasî li pişt de ye, nîrxandin û nêrinên cur bi cur li ser hene. Yekem Partiya desthilatdar a Tirkiyê (AKP), bizavek Îslamî ye, rejîma Komara Îslamî jî naverok û mahiyeta wê eşkere ye ku rejîmek e bi navê Îslamê di deverê de mijûlê wan siyasatan e û eva xalek hevpar ya wan e ku di asta deverê de bikarin bihevve li ser hin pirsên fikrî û siyasî hevaltî bikin û bandorê li ser devera Rojhilata Navîn û bizavên Îslamî ên deverê çê bikin û bi qazanca xwe mifahê ji rewşa siyasî bistînin. Dûyem, ji ber ku niha di Rojhilata Navîn de bedîlek li dor çareserkirina pirsgirêkan tune ye ku weke dewletek bihêz a Rojhilata Navîn temsîla berjewendiyên giştî ên Rojhilata Navîn û her yek ji welatên xwe bikin, lewma Tirkiye dixwaze nûneratiya vê boçûnê bike di deverê de û ji hêlekê ve di çareserkirina pirsê Îsraîl û Sûriyê de gavan bavêje, ji aliyê din ve li gel Îsraîl û Pakistanê rêketinên Ewlekarî wajo bike, ji hêlekê din jî li gel welatên Erebi peywendiyên xwe asayî bike û hewil dide peywendiyek demdirêj li ser bingeha bejewendiyên giştî ên xwe damezirîne. Ji aliyê din ve jî derheq mesela Felestîne de dixwaze wisan nişan bide ku



piştevan û piştgirê Felestîne ye li himber serberedayiyên Îsraîlê de, herweha siyaseta rexnegirtin ji siyasatên rojava bi taybetî Amerîkayê seba piştevanîkirin ji Îsraîlê heye. Lewma Tirkiye komek meselan teqîb dike û dixwaze nişan bide ku li Rojhilata Navîn de rewşek baştir heye û dikare di siyaseta deverê de bandor hebe, dikare li pirsê Etomî a Îranê de alîkar û piştevanek be bo Rojava û Amerîka li dor çareseriya vê meselê de. Wisa nişan dide ku dikare welatên Erebi han bide bo çareseriya arîşeyan ji rîya diyalogê ve, û ji hemûyan girîngtir jî di asta navnetewî de bi taybet bi nisbet Yekîtiya Ewropa, Amerîka û Bîrîtanya ve, pirsê endamê di Yekîtiya Ewropayê de heye û dixwaze nişan bide ku li Rojhilata Navîn de li rewşek baştir û bandorek berçavtir heye û ger bibe endam di YE<sup>e</sup> de, dikare beşek ji givaşên navnetewî û parek ji arîşe û tengasiyên deverê çareser bike û bibe piştevanek menewî bo wan siyasatên ku niha dişopînin bona wê ku di asta Yekîtiya Ewropayê de pêtir çîpiyê xwe qahîmtir bike û bala welatên Ewropayê bo aliyê xwe rakêşe. Herweha li Tirkiyê niha Partiyek Îslamî desthilatdar e û dixwaze bêje Rojava û Ameîkayê, Îslam her ewe nine ku Elqaîde, Cîhad, Hamas û ...qala wê dikin, terorê dikin û siyaseta tundûtuj birêve dibin û hemû kesê wek yek dibînin, lewma AKP' dixwaze xwe wek mîna Îslama nermrew bi Amerîka û Rojava nişan bide û bibêje ku em dikarin di çareseriya pirsgirêkan de bibandor û bi tesîr bin.

**Kek Mihemed Nezîf, her wekî we jî îşare pê kir, niha Komara Îslamî di asta navnetewî de di bin givaşên pir zêde de ye, di navxwe de jî bi heman şêwe û em dibînin ku pêvajoya tepeserî û îdamê ji xurt kiriye, lê ji aliyê din ve êrîşek giştalî kiriye ser sinorên Herêma Kurdistanê û heta hêza peya jî derbasî axa Herêma Kurdistanê kiriye û sinor bezandîye. Armanca Komara Îslamî ji wê şerfrotinê bi Herêma Kurdistanê çîye?**

Derheq Herêma Kurdistanê û piroseya azadkirina Îraqê, rejîma Komara Îslamî di du bereyan de kar dike. Yekem di gel saziyên Şîie û saziyên desthilatdar di hikûmeta Îraqa Federal de peywendî heye. Ji aliyê din ve jî piştevanî ji rejîma Beis û Elqaîde dike bo



alozkirina deverê û bo givaşxistine ser hêzên Amerîka û di rastî de li vê derheqê de siyaseta Topiz û Gêzer girtiye ber xwe. Eyan e yek ji xwastên esasî ên rejîma Komara Îslamî, paşdekişyana hêzên Rojava û Amerîka di deverê de ye bona vala mana qada rimbazêna xwe. Di derbara Herêma Kurdistanê de jî wek mesela Kurd ew bi giştî li gel piroseya çareserîya pirsgerêka Kurd de ninin û dijatiyê pêre dikin û pê xweşî ninin Kurd bigîjin destkevîtan xwe ên siyasî û netewî bi taybetî destkevîtan ku di Çhana îro de bi awayeke berçav piştevaniya siyasî jê tê kirin û di wan çend salane de Kurdan nişan daye ku dikarin îdareyek siyasî, niştîmanî û netewî û îdareyek ku sîmaya demokrasiyê pêve diyar be, çihgir bikin. Ewa jî ligel sîroşt, îdeoloji û siyaseta Komara Îslamî de nateba ye. Jiber wê yekê hemû carê meseleyekê dike hêcet bo desttêwerdana di kar û barên Îraq û Herêma Kurdistanê lewma êriş dike, topbaran dike, xelkê ji gundên wan aware û derbider dike, saman û sîroştê wê niştîmanê dişevitîne û xesar dide. Herweha yek ji siyasatên Komara Îslamî di kakila xwe de dijatiyê kirin li gel piroseya azadiya Îraqê ye, dijatiyê di gel Kurd e bo gihîştin bi mafên netewî ên xwe, dijatiyê kirin di gel wan destkevîtan siyasî, netewî û demokratîk e ku di Herêma Kurdistanê de hatiye çihgirîkirin, dijatiyê kirin e li hember wê yekitiya ku Kurdan li hember terorîzm û paşmayiyên rejîma berê ya Îraqê û herweha ew peywendiyên diplomatîk û siyasî yên berçav e ku niha dibin îdareya Kurd li herêma Kurdistanê li gel dinyaya derve de heye û mesela Kurd bi giştî niha di asta navnetewî de bi giştî wek meseleyek esasî ketiye ber bas û di navendên siyasî, vekolînî û stratejîk de niha weke faktorek guncaw û baş ji bo berbi pêşde birina piroseya demokratîzasyonê di deverê de çav lê têkirin û hesab li ser tê kirin. Lewma tiştê sîroştî ye ku Komara Îslamî jî çavê dîtina wan destkevîtan nebe û bi awayên cur bi cur bixwaze givaşan bixe ser Herêma Kurdistanê, ji bo ku xelkê mijûlê pirsên lawekî bike û rûçikê pêşketî yê wê destkevîtan kêmreng bike, lê Komara Îslamî dê di wê siyasatê de jî weke hemû siyasatên din ên xwe şikestê bixwe çunku hem mesela Kurd, hem destkevîtan wê û hem rolê rêberîya Îraq û Kurdistanê ji bo kesê guman nehiştîye ku rêberîyê şayiste û bi bername ye ku destkevîtan wê jî destkevîtan demokratîk in û di pêşerojê de jî dikare tesîr li ser beşên din ên Kurdistanê jî hebe.

**Em vegerin navxweyî welat û me dît di 22ê Cozerdanê de berevajî pêşbiniyan,**

### **xwenîşandanên berîn yên nerazîbûnê dernekêtin holê, hûn sedemên wê yekê li çi de dibînin?**

Me wek PDKÎ siyaseta tehrîm li hember hîlbijartina sala derbazbûyê girte pêş, belge jî ew bû ku me jêwaye di çarçoveya wê nîzame de tu yasamendî û tu usûleke yasayî nine bo hîlbijartinek azad ku xelk bikare him berbîjêrê xwe bide naskirin, him jî bi azadane dengê xwe bide, him jî çarenivîsa dangan jî bi wî awayî ku bixwe çavniherî lê hene, bikare tesîr û bandor li siyasatdanana welat de hebe. Ji aliyek din ve jî ew morên ku berbîjêrên Komara Îslamî bûn û ji filtera Şêwra Nîgehban derbas bibûn, hemû ew bûn ku di bizava 30 saliya Komara Îslamî de rolek berçav hebûne, tu ji wan ew ninin ku xelk piştê xwe bi wan qahîm bike yan bawera xwe bi wan bîne. Ew jî kesane in ku destê wan rû bûye û di siyasat û cinayetên Komara Îslamî de rol û parek berçav hebûne. Lewma ew beşa xelkê jî di peywendî li gel wê meselê nerazîbûnê nişandan ku di hîlbijartinan de beşdarî kiribûn û balê pawanxwaz li hember wan, helwesta tepeserî, girtin û kuştinê girte pêşberî xwe. Rewşek pêşhat ku dijberên Komara Îslamî û bi giştî Opozîsyona sekolar a Komara Îslamî derketin holê û li hember wê nerazîbûnê de tevî wê pêlê bûn û dirûşmên radikal dan ku çarçove û kakila sîstemê, Wîlayeta Feqîh û Yasaya Bîngehîn nefî kirin û di kiryar de ew bizav, bizavek radikal û sekolar bû û armanca wê xistina rejîma Komara Îslamî bû.

### **Di yeksala derbasbûyî de çima ew bizav giştîr nebû û nekarî di seranserê Îranê de pelê bihavêjê?**

Çunku bizava Kesk a reformxwaz di çarçoveya Komara Îslamî de siyasatê dike û dirûşmên wê telîda wan usûl û yasayan dikin ku 30 sal e xelk xebatê li himber de dike, meselen xelkê Komara Îslamî di tewawiyeta xwe de qebûl nine, wan digot "Komara Îslamî ne peyvek kêr ne peyvek zêde". Wan digot xeta Îmam, lê xeta Îmam xeta jînosayd, qetlîam, dadgehên sehraiyî, tepeserî û cîhad li hember qatên civakê bûye. Wan digot berevanî ji Yasaya Bîngehîn: Yasaya Bîngehîn ku biçûktirîn ronahî têde nine bo çareserîya pirsgerêkan di Îranê de. Bi giştî dema ku ewane dirûşmên wan bin, netewên Îranê ku piraniya xulyaqeta Îranê pêk tînin, tiştê sîroştî ye ku tevî wê nerazîtiyê nebin. Saziyan demokratîk û sekolar ku bi salan e xebatê dikin bo hiloşandina rejîma Komara Îslamî, tevî piroseşê nebin, karker, jin, saziyan çep tevî wê bizavê nebin.

Lewma sîroştî ye ku wê bizave ne rêberîyek biryarder, ne bernamêyê demokratîk, ne siyaseteke emelî û ne jî bawer bi xwebûn heye ku ev bizave radikale piştê wê bigre û tûşî bêhîvîtiyê neke. Çunku gava xelkê nebîne, sîroştî ye ku xelk tevî wê bizavê nabe. Ji hemûyan girîngtir di salroja 22ê Cozerdanê de me dît, Mûsewî û Kerobî ragihandin ku ji ber "parastina can û malê xelkê" û izin nedana Wezaretê Navxwe, bila xelk xwe ji xwenîşandan û derketine ser şeqaman xwe biparêzin.

**Gelo di rastî de ew paşdekişyan bo dilsojiya can û malê xelkê bû yan nebûna cesaretê li rû bi rûbûn tevî Ehmedînejad û Wîlayeta Feqîh de?**

Na, min jêwaye her roja piştî roja Qodsê û roja xwendkar, rêberîya sekolar a wê bizavê peyama xwe bi Mûsewî û Kerobî ragihand ku ew bizava di meydana de, ne bizavek bo piştîvanîkirin ji Serkomarbûna Mûsewî û wergirtina dangan e ji bo ku Mûsewî bibe Serokkomar yan Kerobî. Li Kiryarên wê bizavê de xuya bû ku xelkê Îranê siyaseta derbazbûnê ji reformxwazên dewletî, Mûsewî û Kerobî girtine ber xwe. Lewma wan her di wê demê de pêdaçûn bi rewşa siyasî ya xwe de kirin û bi awayekê çira kesk dan Wîlayeta Feqîh û her wê demê jî ragihandin ku çunkî Welî Feqîh Ehmedînejad qebûl e, em jî nikarin qebûl nekin. Ku waye wan narastewxo teslîmbûna xwe ragihandin û niha jî siyaseta sazani li gel rejîmê girtine ber xwe. Wan niha jî jêwaye Komara Îslamî şemendefîrek e li hêla xwe derçûye û bo vegerandina wê şemendefîrê bo ser hêla eslî a xwe xebatê dikin. Ewe jî li halekê de ye ku xelkê her ew şemendefîrê qebûl ninin, xelkê her ew sîsteme qebûl nine. Lewma eva ku di 22'ê Cozerdanê de ew helwîst girtin, di rastî de dana çirayek kesk bû bi rejîma Komara Îslamî. Lê xala berçav û esasî ew e ku ew nerazîbûnê di roja 22'ê Cozerdana îsal de berevajî raya Mûsewî û Kerobî hatin kirin û dirûşmên wan dijî Wîlayeta Feqîh û Komara Îslamî bûn, dirûşmên radikal, diyarîkirî û armancên siyasî di piştê hebûn. Ewa jî bo piroseya siyasî ya wî welatî ku ji bo azadî, demokrasi, federalîzim û anîneserkara nîzameke demokratîk xebat dikin, peyama xwe gihand û nişan da ku wê bizavê armanca siyasî ya diyarîkirî a xwe heye, ne armanca wê Mûsewî yan Kerobî û diyaloga di çarçoveya nîzame û parastina Komara Îslamî de ye.

**Piştî mangirtina 23'ê Banemerê, rejîm çalakên sîvil û sinfî gazî û destbiser dike û dukanên wan daxixe. Gelo rejîm dikare bi wan givaş û şidetan ve pêşî ji geşekirin û xurtbûna peyama wê mangirtinê bigre?**

Ev bizava siyasî ya Kurd 30 sal e berdewame. Armancên bizava rizgarîxwaziya Kurd diyar in, rizgariya netewî, temîna demokrasiyê, dadpewerî û pêkanîna jiyaneke bextewerane ji bo qatên civakê di Kurdistanê de. Kurdistan her wek derbasbûyî qelaya dakokîkirin ji temîna demokrasi û bîdestxistina mafên demokratîk ên gelên Îranê bûye. Lewma mangirtina xelkê Kurdistanê çend armancên diyarîkirî hebûn. Yekim, rejîma Komara Îslamî re beje ku me peyam û daxwaza xwe heye. Duyem, bizava me bizaveke netewî, niştîmanî û demokratîk e li hember her zulm, zorî û çavsooriyekê de em bêdeng û bêhelwîst nabin. Her wek me dît ku xelkê Kurdistanê helwestek pir hêja û şayiste girtine ber xwe, û ji hemûyan girîngtir bi bizava Kesk jî ku Mûsewî û Kerobî xwe bi zimanhalê wê dizanin, rabîgehînin ku em di demekê de dê piştevanî ji bizaveke siyasî bikin ku xwedî rêberîyek biryarder û bernamêyê siyasî û demokratîk be û bi bizava seranserî ya Îranê jî ragihand ku em bi wî awayî di meydana xebatê de ne. Hêz û şiyana me û bername me piştevanê wê bizava sekolar û demokratîk e ku xebatek berdewam di dest de heye û pêtir ji 30 sal e li hember rejîma Komara Îslamî de di meydana xebatê de ye.

roja Pêncşemî (17'ê Hezîranê) 40 roj bi ser sêdaredana girtiyên siyasî ên Kurd derbas dibe, lê hêj rejîmê termê wan şehîdan teslîmî malbatên wan nekirine, hûn sedema wê yekê bo çi vedigerînin?

Eva siroştê rejîmên dîktator e û tu car li hember xelkê de bersivder nebûne. Dema ew tekoşerên siyasî bê sedem girtin, bê dadgehî, bê parêzer, bê bihorandina qonaxên yasayî bo berevanî kirin ji xwe û îzinnedan bi malbatên wan û heta wunda kirina cihê hepsî kirina wan ew îdam kirin, siroştî ye ku termên wan jî nede malbatên wan. Ji aliyê din ve jî xelkê her wekî nişan da nikarin li hember wê cinayetê bêdeng bin û helwest girtin, lewre rejîmê tirs heye ji helwest û îrada xelkê û ji berbirûbûn li gel xebata cewawerî û nerazîtiyên giştî li himber wê cinayetê. Lewma min jêwaye rejîma Komara Îslamî wan terman nade, tirs heye ji helwesta cewawerî.

Her wek dibînin niha ew welatên ku di dema xwe de rejîmên dîktator têde desthilatdar bûne, her roj em şahidê wê yekê ne ku çendî gorên bikom tên dîtin. Ewa jî nişana wê ye ku di dema xwe de ew xelke hovane jînosayd, qetlîam û şehîd kirine, hemû girtiyên siyasî bûne ku deste deste şehîd û binax kirine, lê niha dibînin destê wan rû dibe û cesed tên dîtin. Komara Îslamî jî yek ji wan rejîmên dîktator û tepeserkare ku bi hezaran gorên bikom niha di bin desthilata wê de hene û girtiyên siyasî îdam kirine. Sala 1367 ê pêtir ji 5000 girtiyên siyasî îdam kirin, û termên wan bi malbatên wan nehatin dayîn Dema bas ji girtiyên Xaweran û çendî gorên bikom ên din tê kirin, nişana wê yekê ye ku Komara Îslamî li hemû cinayetên de cîdestê wê diyare.

### Me xincî spasyê tiştêk nemaye eger we gotinekê hebe?

Belê spas ji bo wê derfeta we Em weke Partiya Demokrat a Kurdistanê Îranê ku di derbasbûyî de me bi bernamexê siyasî û helwîstêk jêhat xebat kiriyê û di pêşerojê de jî her ew siyaseta me de berdewam be, em piştevanî ji bizava azadîxwaziya gelên Îranê, ji xebata siyasî, sivil û ya hemû NGO û sazîyên siyasî dikin û amadeyî hevxebatî li gel hemû wan hêzên siyasî û pêşketî in ku niha di meydana xebatê de ne. Me jêweye ku di çarçoveya rejîma Komara Îslamî de tu guhertinek bi kiryar bi qazanca xelkê nîne. Lewma take rê, hevxebatî ye li gel hêzên siyasî ên Îranî bo hiloşandina Komara Îslamî û çihgir kirina sîstemek demokratîk û federalî.

## Rojev

### Di 80'mîn Salvegera Şehîdkirina Bavê Nasyonalîzma Kurd De



#### Selîm Zencîrî

Her çîqas ku kuncê "Rojev"ê taybet e bi mijarên girîng yê roj û ji mijarên dîrokî û lêkolînî bi dîr e, lê ji ber ku derçûna wê hejmarê hevdem e li gel 80'mîn

salvegera şehîdbûna serok û rêberê kurd ku gelek ked, zehmetî û nîrx ji kurd û kurdayetiye re daye, ne hêsan bû ku em bi sanahî li ser de derbas bin. Lewma her çend bi kurtî jî be, ezê hewlê bidim ku awirekê li ser kar û xebatên wî şehîdî vedim.

Simayîl Axayê Şîkak, berniyas û naskirî bi Simko, yek ji wan şoreşvan û rêberên azadîxwaz di dîroka berxwedan û xebata rizgarîxwaziya kurdistanê de ye ku xwedî qedr, rûmet û xebatek berçav e. Ew piştî mirina bavê xwe bû serokê eşîreta Şîkak û li demek kin de karî kêrhatî, cesûrî, mîrxasî, egdî û şoreşvaniya xwe îsbat bike û ji kesekî bînav û nişan re bibe serokê mezîna, biwêr û xwedî hêzek mezîna a leşkîrî û herweha bibe rûgeha kurdan. Simko rêberê azadîxwaz, siyasîyekî birtî û dûrbîn, şoreşvanekî bi ezmûn û dunyadîti, sowarçakêkî çalak, welatparêzêkî pêşketîxwaz, û li heman hal de jî şervanekî netîrs, hişyar, bi bawer û bi helwest bû ku bi nîrxandî û berhevdana li gel wê serdemê, bêmînak bûye. Simko ji ber qehremanetî û serketînen li dû hev yê xwe karî zû cihê xwe li nav dilê gel de veke û piştevaniya wan bo aliyê xwe rakîşîne û pêgeha civakî û siyasîya xwe jî bilind û qahîm bike.

Simko piştî dawîhatina şerê cihanî yê Yekem, bi mîfahstandîna jî hevkeşe û bûyerên derdorê bi taybet li Tirkiya û Îraqê de û bi awakirina federasiyona eşîretan, derfet bi girîng zanî deselatek herêmî (lê ne bi organizasyonek rêxistinî) ava bike û hemû deverên bakûra Kurdistanê Îranê bixe bin desthilata xwe û hêdî hêdî desthilata xwe berfirehtir bike û bi vê çendê jî nasyonalîzma kurd û hesta netewî bipîşkîvine. Bi wateyek din çend xalên esasî di teyîsîna agirê serhildana Simkoyê Şîkak de bi tesîr û karîger bûn. Weke: Lawaziya Hikûmeta nawendî li Kurdistanê Îranê de, nîfûz û bandora dewletên bihêz yê Rûsiya, Firansa û Îngîlis li wir, bişkîvîna hesta netewî û bîra azadîxwaziya kurdan, zulm û zorîya dewleta Îranê li ser malbata Simko (kuştîna bav, bira, bapîr û xizmên wî bi nemerdî) û li hember de jî geşbûna hesta tolhildana Simko ji karbidestên dewleta Îranê.

Simko li çend salên yekem yê desthilatdariya xwe de pir baş pêş ket û serketînen mezîna li warê leşkîrî de tomar kirin, di warê civakî û siyasî de jî pêgeha xwe jorde bir û wekî lehengekî kurd dihat dîtin. Herweha li warê rawêşbîrî û kulturî de jî gelek gav avêtin û kar û xîzmetên bêmînak encam dan. Li sala 1912'an de, kovarek mehane bi navê Kurdistan li Urmiyê de weşand. Sala 1913'ê de Komeleya Cihandaniya Kurd bi hevkarîya Ebdulrezaq Bedîrxan li Xoyê de ava kir û ji riya wê ve jî, yekem qutabxaneyê modern a kurdî di heman salê de ava kir. Sala 1919'ê rojnameyek hefteyî bi navê "Roja Kurd" ku piştê bûye "Kurd" û organa fermî û zîmanhalê desthilata wî bû, derxist. Herweha Çapxaneyek bi navê Xîret li Urmiyê damezrand û .... Bi vê çendê jî Simko bûye alahilgîrê şoreşa çandî, şarîstaniyeta modern û bavê nasyonalîzma kurd li Kurdistanê Îranê de. Lewma ew kar û xebatên siyasî û çandî yê Simko bi qasê ku bi dilê kurdan bû, ewqas jî dibûye xorega nerihetî, tirs û

kerb û kîna desthilatdarên Îran û Tirkiyê û heta dawîya jiyana xwe bi sam û bi heybet jiya.

Simko li heyamê desthilatdariya xwe de serbarê wê ku çend caran tûşî şîkest, derbiderî û koçberiyê bibû, lê tim hewil dida bi dewletên biyanî, bi taybet Îngîlis û Soviyetê re pêwendiyên siyasî pêk bîne û bala wan bo piştevanî ji serxwebûna Kurdistanê



û çareserîya pîrsa kurd rakîşîne. Lê helkevta jeopolotîk a kurdistanê û berjewendiyên aborî û siyasî yê hevpar yê wan tim asteng bûn. Ji hêla din ve jî bi bişkîvîna û vegeşîna nasyonalîzma netewên serdest li Îraq, Tirkiyê û Îranê û bihêzbûna wan li hundurê xwe de, hêdî hêdî bazneya zext û givaş û dorpeçên li ser kurd û tevgera Simko dihat teng kirin. Çunku hevdem li her sê welatan de serhildanên kurdan hebûn û çunku Rîza Şa bi piştevanî û hevkarîya rasterast a Îngîlîsan hatibû ser kar û li Îraqê de jî bi heman şêwe Îngîlîsî serdest û piştevanê dewleta wê bûn. Ji ber wê ku pêwendiyên wan bihevre tîk neçîn, amade nebûn ku piştê tevgera rizgarîxwaz a kurd bigrin. Herweha çihgirbûna dewletên nasyonalîstî yê Tirk, Faris û Ereb ji wan re bibû hewcehiyek. Herweha wan dewletan serbarê pêwendiyên siyasî û dana puanên aborî bi hev, peyman û rêkettinnameyên ewlehî jî wajo kirin. Bi taybet Rîza Şa bona wê ku qada xebatê ji Simko berteng bike, peymanek 5 Salî li 22'ê Avrêla 1926'an, bi navê "Wedadiye" bi Tirkiya re girêda, ku du beşên wê peymanê taybet bûn bi lidûketina şoreşvanan û dabînkirina asayîşê bo sînorên hev û din.

Lewma Simko li nav hevkeşeyên siyasî yê li navbera hêzên Soviyet, Îngîlis, Tirkiyê û Îranê de tûşî sergêjiyê bibû û li dan û standînen wan de gerr gihiştîbû listîna bi karta kurd û bi taybet şoreşa Simko, ji hêla din ve jî nebûna organizasyonek rîk û pêk, îxaneta serok eşîran û piştberdana ji Simko li demên tengasiyê de, zêdetir Simko tengav û li gihandina bi armançên xwe de bêncam hiştîbû. Lewma li vê navberê de û li nav listîka siyasî a wan dewletan de, Simko çîqas zîrek, hişyar û çalak bibûya, renga karîba pêşiya fetîsîna xwe li vê bahozê de bigre. Li rastî de jî nekarî xwe li hember wan de biparêze, çunku çend sal bû ku li ser sînorên Îran, Tirkiyê û Îraqê de bê hebûna tu piştevanekê, derbider û sergerdan mabû û aqîbet jî di pîlanek darêfî û necamêrane li 30'ê Cozerdana 1309 (1930)'ê de ji aliyê serleşkîrêkî dewleta Îranê ve bi navê gotûbêzê li bajarê Şinoyê de hat terorkirin û dawî bi şoreşa wî hat.

Lê jî wê jî xembar û dilêştir jî ev e ku gelek kesan hewil dane kesatiya wî rêberê kurd bişkînin û bi bînpêkirina hemû pîrensîpên exlaqî xwastine bi bîr û hizrên xwe yê şovenîstî, serhildana Simko berevajî û bi armanca tolhildanê nişan bidin û tevgera wî jî bi eşîretî û herêmî bihesibînin. Herweha bi binavkirina wî weke diz, talançî, îxanetkar û ..., xwastîne kîncên mirovahiyê jî cestyeyî wê derbînin û wênecyê xirab û nebaş jê bineqşînin. Eva jî siroştê dagîrker û neyarên kurdan e ku dixwazin rêberên me bêqedr û qîmet bikin û dîrokê li gorî xwe bixemlînin. Rast e ku Simko tu car kerb, kîn û hesta tolhildanê li derûna xwe de bi nisbet dewleta Îranê neveşartîbû, herweha renga tûşî hin şaşîyan jî bibe, lê şoreşa wî tam siyasî, netewî û modern bû. Belge, name, kar û çalakîyên wî, herweha çavkaniyên bêalî yê mewcûd jî bi başî vê yekê diselîmînin.

Di 80'mîn salvegera şehîdkirina wî de silavên emegnasî û wêfadarîyê bo ruha pak ya wî û hemû şehîdên riya rizgariya kurdistanê dişînim û bejna xwe li hember cangorîtiyê û qehremanetiya wan lehengan de kîmoj dikim û dibêjim dîroka pîrr ji şanaziya ku we afirand, we jî ji bîr nake.

## RONÎ

## Quncikek ji bo şiroveya bûyer û babetan ji xwendevanên "Agirî" re

Ebdulla Hicab



## Hezar Gotin Nabin Yek Kirin

**B**iryara hejmar 1929 ya Konseya Ewlekariya Rêkxistina Neteweyên Yekgirtî ku roja 09.06.2010 bi 12

deng ji 15 dengên endamên rêkxistinê hate pejirandin û hinek xelesa dorpêçên abûrî li ser Îranê şidand, dijkiryarên cuda hebûn. Di demekê de ku welatên xwediyê pêşniyarbiryarê, ev pêgav weke serketinek dîplomatîk û nişaneya hevdegiya cihanî li hember zêdegaviyên Îranê nişan dan, birêveberên Komara Îslamî bi keys û laqirdiyan pêşwazî ji biryarê kirin. Ji bo Ehmedîniyad û hevbiir û piştgirên wî, ev biryar jî tenê axaftinek nû ya bêçine ya grûpa 5 + 1 (DYA, Federasiyona Rûsiye, Çîn, Feranse, Şanişîna Hevgirtî + Alman) bû ku wê tu karîgerî li ser Îranê tune be.

Dema mirov temaşey dan û standinên wan 30 salên dawîye Civaka Navneteweyî bi Îranê re dike, renge ji aliyekê ve maf bide rêberên rêjîmê ku ji ber biryara nû ya KENY qey ber xwe nekevin. Ji ber ku heya niha her li ser doza projeya Etomiye Îranê, Konseya Ewlekariyê 3 biryarên dorpêç kirina Îranê dane û tu ji wan biryaran nekariye bêhna rêjîmê çik bikin. Beriyan wan 3 biryaran jî DYA bi salan qaşo Îran dorpêç kiribû, lê bikiryar tu gav pêwendiyên xwe yên bazirganî bi Îranê re qut nekir.

Abûriya Îranê li ser bingeha firotina nevtê hatiye ava kirin ku ji salên 1950 û pêve her tim berîka karbidestên welat pir dike û destên wan ji bo pêşvebirina her pîlan û pirojeya ku bi xwe bixwazin, vekirî hîştîye. Ev beşa bazirganiyê xêra herî mezin dide şirketên petrolê yên DYA. Şirkên sereke yên bazirganiya Îranê heya hilweşîna rêjîma Paşatiyê di sala 1979 de Amerîka û welatên Rojava bûn, lê ji wê demê û pêve, rêjîma nû berê xwe da Rojhelat û welatên nûvegeşiyayî yên Asia. Dorpêçên ku di serî de Amerîkayê xistin ser Îranê, ev pêvajo hê bi hêztir kir.

Bi nav dorpêçkirina Amerîkayê, di heman demê de rê ji bo bazirganiya bi dizî bi Îranê re vekir. Ne tenê beşa pişesaziya sivil û bazirganî, lê pişesaziya çekên Amerîkayî jî riyên nû ji bo bazara Îranê peyda kirin. Çekên Amerîkaiye Îranê weke balafirên şer yên F4, F5, F 14, C 130 û hwd tu gav ji ber kêmaniya emrazan, ku pêwîst bû ji Amerîkayê bân an bi riya hevpeymanek Amerîkayê re bigehin Îranê ji kar neketin.

Di salên navbera 1980-88 de, şerê bi

Îraqê re karîgerî li ser hemû warên jiyana abûriye Îranê hebû. Di wan salan de hemû pareyê ku ji riya firotina nevtê ve dikete destê karbidestên ji bo kirîna çekan dihate bikaranîn. Rûsiye, Çîn, Koreya Bakûr û welatên din yên hevpeymanê Yêkîtiya Sovyeta pêşîn bûne şirkên nû yên Îranê. Lê bi dawî hatina şer li sala 1988 û pilana abûrî ya ku Refsencanî di destpêka salên 1990 de bingeha wê danî, pêşveçûna abûriya Îranê ku ji sala 1979 ve di rojevê de nemabû dubare vejiya.

Refsencanî zêde giringî da sermayeya bîhanî û sermayeya Îraniyên ku li derveyî welat dijiyan, lê derfetên wan yên abûrî hebûn ku sermayeya xwe vegehrînin welat û di beşa pişesazî û ticaretê de bixin kar.



Dema zemîneya vegera sermayeyan amade bû, DYA biryar da ku pêşiya razandina sermayeya Amerîka li Îranê bigre, lewma di sala 1995 de Kongreya Amerîka biryar da ku tu sermayeya Amerîka derbasî Îranê nebe. Biryarê bi tenê pêşiya çûna sermayeya Amerîka bo Îranê girt, lê nekariyê pêşiya bazirganiya şirketên Amerîkayî bi Îranê re bigre.

Li gor agahiyên ECONNEWS'ê, Îran di sala 2010'an, de bi 50 welatên cihanê re pêwendiyên berçave yên abûrî û bazirganî hene ku hema hema hemû welatên grûpa 5 - 1, piraniya welatên Ewropayî û Japon di nava wan welatan de ne. Her weha Îmaretên Yekgirtî yên Erebî, Koreya Başûr, Turkiye, Hindistan û Swîs ku dost û di gelek waran de hevpeymanên Amerîkayê ne di nava wan welatan de ne. Xêncî ji wan welatan, Koreya Bakûr, welatên Sovyeta berê, Îraq, Sûriye, Pakistan, Efxanistan, welatên Amerîka Başûr û hin welatên Afrîqayî bi Îranê re bazirganiyek xurt hene.

Nayê zanîn ku tu ji wan welatan, şirketên Amerîkayî jî di nav de, amade bin ku berjewendiyên xwe yên ticarî bikin qurbaniyê siyasîyê ku cidîbûn û

karîgeriya wê li ser guherîna dan û standinên Komara Îslamî bi cîhana derve re ne diyare. Lê îmkân heye ku ji wan pêwendiyên hê zêdetir hin deriyên bazirganiya qaşax jî bi Îranê re vekin. Ev yek jî derfetek zêrîn dide karbidestên Komara Îslamî ku hê zêdetir zextê bidin tevgera guhertinxwaze navxweyî û zexta li ser gelên Îranê hê zêde bikin.

Her çend dorpêçkirinên nû biryare pişesaziya çekan, pirojeyên Sipaha Pasdaran û rabûn û rûniştin û bizavên kesayetiyên girêdayî bi Sipaha Pasdaran û tora terorê ya Komara Îslamî di herêm û cîhanê de ji xwe re hedef bigre, lê hê carê nexuya ye ka ev dorpêç kirin ji yên heya niha serketîtir be. Îro dirav, pişesazî, bazirganî, çek û hemû dezgehên deselatê di destê Sipaha Pasdaran û hêzên besic de ne. Dema dorpêçkirinên nû bi awayek cidî bikeve rojevê û qaşo karîgerî jî hebe, wê bi tenê rewşa jiyana xelkê sivil nexwestir bike.

Biryara 1929 di gel ku hem bi naveroka xwe û hem jî bi zimanê xwe ji her 3 biryarên beriyan xwe cudatir e, lê Îranê gelek deriyên cuda di bazirganiya cihanî de vekirine ku renge jêre alîkar be heya bikare karîgeriya vê biryarê jî kêmtir bike. Lewma karbidestên rêjîmê weha bê minet biryara nû bê mana didin nişandan.

Gotinek berê heye dibêje, hezar gotin nabin kirinek. 30 sal in DYA û hevpeymanên wê yê nêzîk basî dorpêçkirina abûriye Îranê dikin, lê bi kiryar heya niha bi qasî pûşekê zext nexistine ser Îranê. Li ber çava ye ku bi sedan karbidestên herî bilind yên Sipaha Pasdaran û sîxurên Komara Îslamî bi navê lêkoler, diplomat û... di zankoyên Amerîka de perwerde dîtine û niha di dezgehên birêveberiya Îranê de kar dikin.

Komara Îslamî wê tenê demekê bikeve bin zextê û xwe neçar bibîne guhdariya şîret û biryarên navneteweyî bike, dema ku di asta cihanî de bi yekdengî û bi cidiyetek pitir pê re dan û standin bê kirin. Riya herî karîger ji bo guherîna reftara Komara Îslamî ev e ku alîkarî bê kirin ku gelên Îranê ji destê vê rêjîmê xelas bibin û sistemek demokratîk bikin cigirê teokrasiya deselatdar. Ji bo wê yekê pêgava herî giring, ewe ku deriyên navend û dezgehên navneteweyî ji opozisyona Îranê re bân vekirin heya ku hawara gelên Îranê bigehînin hemû cîhanê.

## Rê û Resma 30' mîn Salvegera Avabûna Radyo Dengê Kurdistana Îranê Hat Lidarxistin

**R**oja 17'ê Hezîrana 2010'an, li binkeya Deftera Siyasî a PDKÎ, bi amadebûna Mistefa Hicrî, Sekreterê Giştî yê partiyê û endamên Deftera Siyasî û komek ji endamên Komîteya Nawendî û kadro û pêşmerge û malbatên wan û herwiha rêveberên Radyo Dengê



Kurdistana Îranê, di rê û resmekî berfireh de, 30' mîn salvegera avabûna vê radyoyê bilind hat nixandî û rêz ji xebat û tekoşîna bêwestiyan a rêveberên vê hat girtin.

Destpêka vê rê û resmê bi Bilûla Qalemere, marşa Radyoyê û xwendina sirûda netewî ya "Ey Reqîb" û deqîqeyek bêdengî bo rêzgirtin ji canê paqîje şehîdên rêya rizgariya Kurdistanê dest pêkir.

Piştê Mistefa Hicrî bi vê hilkevte axaftinek pêşkêş kirin.

Hicrî di axaftina xwe de, hawriyek ji dîroka pir ji serwerî û destkevt a Radyo Dengê Kurdistana Îranê da û ew bi yek ji dezgehên herî girîng ên ragihandinê li qonaxên cuda wesifand. Hicrî herwiha da zanîn, Dengê Kurdistana Îranê karî rastiyan civakê weke xwe bi guhê xelkê bigehîne, renga piştî Komara Kurdistanê ku radyoyekî mehelî û kêmhêz bû û nûçeyên wê demê ên Mehabadê û derdora wê belav dikir, Radyo Dengê Kurdistanê yekem ragihandina giştî a Kurd bû ku bi awayekî baştir karî dengê rasteqîne a xebatkarên û tekoşerên kurd bi guhê xelkê Kurd û netewên din bigehîne, lewra di dema ku wê radyoyê dest bi karên xwe kir bûye çavkaniya nûçeyên rast, hemû aliyên din û heta ji binke û navendên desthilata Komara Îslamî bo haydarbûn ji nûçeyên rastiya bûyerên deverê û şer û berxwedana pêşmergeyan tevî hêzên tepeskerên Komara Îslamî, guh ji Dengê Kurdistana Îranê digirtin, ji ber ku Radyo Dengê Kurdistana Îranê rastiyan bûyeran bi bê Weşartin radigehand.

Mistefa Hicrî di beşeke din a axaftina xwe de îşare bi rola radyo û bandorên wê kir û di heman demê de rêz û qedirsaniya PDKÎ bo hemû wan têkoşerên ku di derbasbûyî heta niha di vê radyoyê de kar kirine, dubare kir û bi taybetî rola rêberê jêhatî ê gelê me, Dr. Qasimlû bilind nixand.

Piştê peyama komîsyona Radyoyê ji aliyê Luqman Mêhfer, endamê Komîteya Nawendî û berpirsê vê komîsyonê ve hat pêşkêşkirin ku di vê peyamê de bi hûrî îşare bi giranî û pêgeha taybetî a Radyoyê kir û bi yek ji dengê rasteqîne û rasbêjî û cihê baweriya xelkê Kurdistanê û Şoreşa Kurd wesifand. Di beşeke din a vê peyamê de, Mêhfer îşare bi wê rewş û zirûfa ku radyo tede ji dayîk bi bû, kir.

Piştê di çend beşên cuda cuda de bi vê hilkevte peyama pîrozbahiya Yekîtiyên Jinan, Ciwanan, Xwendekaran, Komîsyona Çapemenî û herwiha Yekîtiya Pişeyî a Mamostayên Kurdistana Îranê û Yekîtiya Zanayên Olî ên Kurdistana Îranê hatin pêşkêşkirin û piştê tabloyek û lewhêkî rêzîlênan ji aliyê Yekîtiya Ciwanan û herwiha tabloyek ji aliyê malbata şehîd Ebdurehman Lahîcanî ve pêşkêş bi komîsyona Radyoyê hat kirin.

Dûre pexşanek ji aliyê Keyhan Yûsifî ve hat xwendin. Herwiha bi nûneratiya Deftera Siyasî a partiyê ve ji xelata rêzîlênan bo Komîsyona Radyoyê ji aliyê Mistefa Hêcrî ve pêşkêşî kek Luqman Mehfer û herwiha çar kadroyên kevnan ên vê komîsyonê bi navên: Muhendis Riza Xeyatî, Nûredîn Sofîzade, Siyamend Terbî û Resûl Qorxî hatin pêşkêşkirin.

Hêjayî gotinê ye, dawiya vê rê û resmê bi şahî û dîlana beşdarbûyan bi dawî hat.

## Sî Sal Xebat û Tekoşîna Bêrawestan



**Şehab Xalidî**

Buhara sala 1359 (1980)'an Buharek cudatir ji her buhareke din bû, helbet cudahî bi wateya xwe a siyasî. Belê serbarê vê yekê ku li Kurdistanê de şerêkî bê navber berdeham dikir, û dengê belengaziya

kurdan ji sînorê Kurdistana Rojhilat jî derbas nedibû, lê ve carê jî wek hemû carê bîr û hizra tûj û berfireh a şehîdê nemir Dr. Qasimlo bi hewara Kurdan de hat û gelê Kurd ji ve astengiyê derbasî qonaxêke din a xebat û tekoşîna ji bo rizgariya netewî kir. Belê li roja 27'ê Cozerdana sala 1359'an de, Dr. Qasimlo bi peyama xwe a pîrr wate, damezrandina Radyo Dengê Kurdistana Îranê ragihand. Damezrandina vê dezgehê di vê serdemê pîrr aloz de, wek derketina tîrêjên rojê li esmanê pîrr ji bêdadiya Kurdistanê de bû, ku karî bala her kesî bo aliyê xwe rakêşe, ji cotkarên ve bigre heya mamostayan, ji kedkarên ve bigre heya xwendekaran û gişt tex û qatên welat. Ew biryar di wî serdemî de biryareke gellek bi cî û di heman demê de nîşaneya zanayî û hişyariya bê qas ya Dr. Qasimlo, û hestkirina bi hebûna valatiyekê li tevgera rizgarîxwaziya xelkê Kurdistanê de bû.

Hekî li drêjahiya dîrokê de, yekem car di sala 1918'an de bû ku nûçeya bidawîhatina şerêkî cîhanî jî rêya radyoyê ve dihate bilavkirin, li Kurdistanê de jî yekemîn car bû ku mizgîniya bidawîhatina vê hemû bêdengiya ku li derheq kuştina Kurdan de hebû, ji rêya Radyo Dengê Kurdistana Îranê ve dihate dan. Hekî wê demê ragihandinên xwedîhêz ên propagandeyî ên dewleta Îranê hemû rojê bi nûçeyên pîrr ji direv û nerast derheq xelkê Kurdistanê bilav dikirin, û gelê Kurd jî wek kafir dihesêbandin û biryara xeza (cîhad)ê bi dijî gelê Kurd bi rewa dizanîn, lê li hember de gelê Kurdistanê, eşkerekirina vir û direvên wan dem û dezgehên propagandeyî ên rejîma Îranê kire serhêla çalakiyên xwe ên herî girîng, ku li encamê de bû yek ji wan kême radyoyên cihê baweriya xelkê Kurdistanê.

Xala herî balkêş û girîng ew e ku serbarê rewşa nebaş a abûrî û îmkanatên kêr û destpêrenehîştina bi şarezayên pitir di ware karê ragihandinê de, hertim radyo li jêr agirê top û xompareyên rejîma Îranê de bûye, lê dîsan bi bê rawestan serbarê gişt kêmasiyan karê xwe domandiye û bûye kelema çave dijîman û bûye cihê hêviyê bo xelkê Kurdistanê.

RDKÎ heya niha nêzî 20 carî cihê xwe bi sebebên curbicur guherî ye, û di vî heyamî de carna bi nûçeyên xweş ên weke serkevîna pêşmergeyan li eniyên şer de ken û sema xistiya ser lêvên dayîkan, û li ser lêvên şeq-şeqbûyî ê zarokên sêvî û hejar. Lê carna jî bi nûçeyên xwe ên dilêş, wek nûçeya şehîdkirina Dr. Qasimlo û Dr. Şerefkendî xem û keser û girî dikire mêhvanê xelkê Kurdistanê.

Vê demê bû ku di nav dumana bêdadaiyê de, bilura Qalemere û siruda Ey Reqîb morala herî xwedîhêz didane gelê xwe û rihê berxwedaniyê di nav cesteyê wan de diafirandin. Ew moral û ew rihê berxwedaniyê sînor jî derbaskiribûn, û pênûs û ziman ji pesna ve aciz mabûn. Belê vî dengî bi hezaran bîranînên tal û şîrîn di mêjiyê her takekî Kurd de afirandin.

RDKÎ bi hezaran bîranînên tal û şîrîn di mejiyê her takekî Kurd de afirand. Ew deng ji bo malbatên şehîdan jî ne tenê bi hezaran bîranînî afirandin, bel' ji bo wan sedan wate hebûn. Wateya emegdarî, domandina rêya şehîdan û hêvdarkirina wan bi rojên geş û xweş ên azadî û serbestiyê.

Ez bawerim ew roj dê bihêt ku em mizgîniya bi davîhatina temenê pîrr ji cinayetê deshilatariya Îranê, û damezrandina sistimeke gelî û demokratîk, ji vê çepera berxwedaniyê, anku ji RDKÎ'ê ve guhdarî bikin.



## Di Roja Cîhanî A Penaberan De Awirek Ji Rewşa Penaberên Kurd



**Ceifer Mubeşirniya**

Di dema peydabûna bi dû hev ya hoz, qewm, gund, bajar, herweha dewlet û netewan, qonax bi qonax, her yek di

dema xwe û bi sedemên cuda diyardeya penaberî hebûye û niha bûye bi diyardeyê cîhanî. Ewa ku berê di Kurdewarî de bi xerîb yan xerîbe hetine naskirin, herweha di nav netewên din de jî xerîbe hatine xwedîkirin û piştevanî jê hatine kirin. Lê bi dirêjîya dîrokê û pêşkevîtinên mirovahiyê, û parastina berjewendiyên pêkhateyî û netewî, hin ji netewe û pêkhate negihîştin mafên siroştî ên xwe û bi awayekê mafên siyasî, çandî, aborî û civakî ji wan hatin zevtkirin û ewlehiya jiyana wan kete metirsîyê. Lewma diyardeya penaberî yan koçberîya bi tak û bi kom ji civakê bo cihek din pir zêdebû û bûye berçawiyek cîhanî.

Di encama kar û xebatên civaka cîhanî de ji bo wê pirsê di asta navnetewî de saziyek penaberan ev e: Penaber kesek e ku di peywendî li gel pirsên netewî, nijadî, mesebî, bawerên siyasî û endambûn di hin ji girovên civakî de ewlehî, tenahî û jiyana wan bikeve metirsîyê de. Herweha ew penaber li her welatekê ku bizanin ew metirsî li ser wan kêma dibe, erkê wan welatan e ku li gor yasayên navnetewî ew maf bi wan bihên dan.

Xala sereke ya wê saziyê ji bo pênasaya penaberan ev e: Penaber kesek e ku di peywendî li gel pirsên netewî, nijadî, mesebî, bawerên siyasî û endambûn di hin ji girovên civakî de ewlehî, tenahî û jiyana wan bikeve metirsîyê de. Herweha ew penaber li her welatekê ku bizanin ew metirsî li ser wan kêma dibe, erkê wan welatan e ku li gor yasayên navnetewî ew maf bi wan bihên dan.

Li gor rapora Komîsaryaya Bilind a penaberan pêti 42 milyon kes di cîhanê de penaber in ku 2 ji 3 a wan di bin givaşên desthilatdarên welatên xwe de bi neçarî ji mal û halên xwe hatine dûr xistin û her yek ji wan di welatên cur bi cur de cihgîr bûne, lê wek pêwîst ji aliyê wan welatan ve rêz ji penaberan nayê girtin.

Herweha îtiraf dike ku saziya Navnetewî di wî warî de xemsa e.

Diyardeya han gellek bas û şirove û analîzên cuda li bizavên cuda de hildigre, lê em dê xwe ji hûrdekariyan biparêzin û awirekê rewşa penaberên Kurd li Kurdistana Îranê de bidin û wan li gor yasayên Navnetewî û yasayên welatên din di warê penaberan de binirxînin.

Wekî eyan û eşkere, gelê Kurd weke neteweyek mezin di vê Cîhanê de bûna wê heye, lê bi dirêjîya dîrokê bi giştî bindest û mafxwarî bûye û di 30 salên derbazbûyî de jî bi awayek taybetî givaşên giştalî bi taybetî siyasî li ser Kurdan hatine meşandin û kurd bi awayên hovane ketine ber pêlên



siyaseta reş a Komara Îslamî. Ew rewşa nebaş ya Kurdan li xeterketina tenahiya canî û malî ya wan bûye sebeb ku hejmarek zaf ji wan bo nefeskêşanek azad û demkî jî be, ji zêd û nîştimana xwe dûr ketine.

Penaberên Kurd jî yek ji wan pêkhate û qatên civaka Kurdî ne ku tirajîdayên wiha derbas kirine ku dîrin ji jiyana û rewşa îroyîn a cîhanê, derdikeve ku di penaberiyê de jî mafxwarî ne.

Belavbûna penaberên Kurd ên Îranî li Îraqê jî bo ku bigîjin meqsedên xwe anko welatên sêyem, rewşa wan ya xerab û bendewar û bê bersivhiştina wan bi çendîn salan bi bê rênimayiyên saziyên navnetewî ên peywendîdar bi wê meselê, hewilnedan ji bo derbazkirin bo welatên sêyem û ne jî hebûna mafê hevvelatîyê û birêvebirina pêvajoya jiyana û hin pirsgrîkên din ên di warê pirsên siyasî de mafên penaberiyê ji wan hatiye zevtkirin. Ji aliyek din û di welatek din ên ku penaberên Kurd rû lêkirine, welatê Turkiye ye ku rewşek pir xerabtir heye weke, lînepirsîn û pêşnegirtin ji rîftarên nebaş ên polisên Turkiye, nebûna îzna karkirinê ji bo xwe jiyandinê, pirsasî siyasî û netewî ku hertim weke nerîtek zaftî ji tirkên faşîst re pirsasî sereke bûye û bersivnedana organên UN ê, kêşe û arîşeyek micid ji wan re pêkaniye ku heya niha bi dehan car girevên birçibûnê û heta xwekujiyê li nava wan de rû daye, xêncî nebûna derfeta xwandin û perwerdeya ji zarokên wan re.

Li cihek din bi awayek taybetî ez pirsasî hejmarek din ya penaberên Kurd bînim ziman, ew jî ew penaberin ku berî çend salan li kempek nîzik Romadiye ya Kurdistana Îraqê birêketin û li ser sînorên Îraq û Urdonê hatine ragirtin û bi bê kêmtirîn îmkanatên jiyana û windabûn ji çavên aliyên peywendîdar ku birastî baskirin li ser rewşa wan dilê her miroveke biwîjdan dihejîne, jiyana diqedînin. Piştî êrîşa Amerîkayê bo ser Îraqê ew derbazî wan sînoran bûn û welatê Urdonê ne mafê

penaberiyê ji wan re pejirand û ne jî îzna derbazbûn li sînorên wî welatî re da. Bi her awayekê be hejmarek ji wan derbazî welatên Ewropayî bûn û ewên din jî her wisa di wê rewşa nexweş û xeraba jiyana de mane. Piraniya wan penaberan jin û zarok in ku hejmarek ji wan jî jin û mêrên bi temen in ku seba nebûna xorek û ewlehiya jiyana tûşî nesaxiyên cur bi cur bûne û di wî halî de jî tu îmkanateke dermanî û tendirostiyê di îxtiyara wan de nine, ew di xîwetan de dijîn û îzna kar û kasibiyê ji wan re tune ye. Bi kurtî her deriyek ji bo xwe jiyandinê li ser wan daxistî ye.

Ew rewşe di demekê de ye ku Cîhan pir ji yasa û pênasayên wan yasayan ku di alema xwe de beheştêk berîn ji mirovan re pêkaniye. Yek ji wan yasayan ku di Cîhana Îslamî de pir bandor e, daxuyaniya mafên mirov ên Îslamî ya Misrê ye ku tîde hatiye, "li gor bawer û buhayên Îslamî, her mezlûmek ku xwazyarê hevkarî û penaberiyê be, erkê her takekê misliman û bi taybetî dewletên Îslamî ye ku jêre hevkarîyê bikin û mafê penaberiyê bidnê, lê cuda li wê yekê ku welatên Îslamî çî hevkarî nekirine, belkî sebebên eslî ên penaberî û di wê derê de jî bêmafîkirina penaberên Kurd bûne.

Ji aliyek din ve jî ew yasayên navnetewî û saziyên li gor wan yasayan hatine damezrandin û bi navên cur bi cur pêdagirî li ser mafên mirovan, bi awayekê di bin bandora rewşa siyasî a welatên superhêz de kar dikin.

Weke xuya, ew sazî pêtir karê organîk ên xwe birêve dibin, lewma gelek caran li hin welatan saziya UN ê çalak e û li hin welatan jî bo heyamên dirêj karê xwe disekinînin bi bê li berçavgirtina rewşa penaberan.

Lewma ji bo penaberan ew dimîne ka kengê berjewendîya wan dê bi berjewendîya desthilatdarên Cîhanê re bizelîqe û bi cih hatina hin ji armancên wan di bi cihhatina tev armancên zilhêzan de be.

# DOSTANÎ

ADAR JIYAN  
adarjiyan@mynet.com



**H**ingof û tewatên (şaşî û fehşiyên) bêsinor û hewldan û xebatên bêbinyat, bi saya hizirîna diyalektîk li bertek û lebatên rasteqîn

dadigerin.

Formûlasyonên zanistî yên diyalektîk, tenê perdeyên reş û tarî yên ku li ber çavên mirov hatine danîn nade alî; her wiha toz, talaz û xubara ku bi hezaran sal bi ser hiş û hişmendîya mirovahiyê de hatiye reşandin jî dimale.

Ramana zansitî, rasteqîna hebûn û xwezayê eşkere dike. Û bi hemû aşkîşa xwe rastî û rastîniya jiyane li ber çavan radixe.

Têkiliyên xayedar û manîdar li ser rîknê ferasetên mirovî û aştiyane aj didin û geş dibin. Ferasetên aştiyane, jî bi avakirina dostaniyên hîmdar û bergehdar manîdar dibin û digihîjin mebsta xwe.

Her heyîn û kirû bi pozberê xwe re diwêlîde, dijî û diguhere. Dostanî jî yek ji van kirûyên civakî û komelayetiyê ye ku bi dijminahiyê re derketiye holê û li kirûyeke girîng watedar dageriyaye. Her çendî ku di vê babetê de em ê pesn û wesfê dostaniyê bidin jî divê em hinekî têkilî dijminahiyê jî bibin. Lewre, gava ku tégîhek tê ravekirin, divê dijber û dijjwateya wê wê jî were qalê û pête nasandin ku wateya wê ya rastî bê dayin û fêmkirin. Ango em ê qet pesnê dijminahiyê nedin û heta jî me bê, em ê راستiya wê li ber çavan raxin. Belê ya rastirîn, pêşî em ê herdu tégînan rave bikin û peyre jî rikberî û lêknekeriya wan rûberî hev bikin.

Dostanî; jî hest û dilniyên hûrbîn, ji mebest û faresetên pejnkar, jî pêwendiyên jidil û bidil pêk tê û geş dibe. Belê dijminayî jî, ji dilniyên bindest, jî zext û ferzîneyên zordest û jî têkiliyên sermest û berjewendperest pêk tê û şêwe digire. Dostanî jî rengîni û hevahengiyên xwezayê dinime. Belê dijminahî jî pevçûn û lêkdanên bêwext û bêbext dinisile. Dostanî; çeqa hest û bestên pak e. Belê dijminayî, feqa kerb û kînen tirsak e. Dostanî, xweşbîniya jiyane ye. Belê dijminayî, reşbîniya çîhanê ye.

Dostanî, pêwendiyêke siruştî ya qedîm, nemir û mayinde ye. Dijminayî, çêkirî, demdemî, guherbar û bêteşe ye. Dostanî, şahî û dilgahiya takekes, aramî û giramiya civakê ye. Dostanî, pêşbînî û xweşbîniya dahatûya jiyane ye. Dijminayî, kîn û reşbîniya raboriya mirovahiya çîhanê ye. Dostanî, hezkirin û azweriya azadiyê ye. Dijminahî, jêvereşîna şer û şerûdiyê ye. Dostanî, ewleyiya aşti û aramiyê ye. Dijminayî, kana kerb û xerabiyê ye. Dostanî misogeriya yeksanî û azadiyê ye. Dijminayî, rîknê fitneyî û fesadiyê ye. Dostanî, rêzdariya peyrewên mirovahiyê, dijminayî, bingeha dilmayin û hesûdiyê ye. Dostanî, mehweya çêj û kêfxweşiyê, dijminahî mehsera xezeb û kezzebreyî ye. Dostanî, avhewayî şad û şadimaniya bextewariyê, dijminayî, jan û jandariya bêbextiyê ye.

Dostanî, ken û bişirîna takekes; dijminayî, girîn û ingirîna civakê ye. Dostanî, hez û besimîna mirov, dijminayî, merez û mirûzdariya mirovahiyê ye... Bi kinayî dostanî, ahengdarî; dijminayî, stembarî ye.

Hîmê dostaniyê, yeksanî ye. Di têkiliyên yeksan de parastina berjewendiyên ezperest û xweperest ne pêkan e. Pêwendiyên dostaniyê yên jidil û can hemû li ser vî hîmî tene domandin. Dostaniya rastî, qet rê nade bêheqî û bêbextiyê. Dostaniya rastî, destûr nade xwekustîn, hevkuştin û komkuştinên civakî. Dostaniya rastî, rê nade alozî û tevliheviyên komelî. Dostanî, destgirtin û hevgerî e. Dostanî, hezkirin, rêzgirtin û giramî ye. Dostanî, jihevezkirin û jixwehezkirina mirovî ye. Dostanî, berpirsiyarî û peywirdariya lihevhatina civakî ye. Dostanî, astengkirin û rêlibergirtina hemû cureyên dijminahiyê ye. Dostanî, afirandin avakirin, lêkirin û çêkirin e. Dostanî, panzehîra fesadî, paşgotin, dexesî û pexiliyê ye. Dostanî, rûxandina text û paytextên stembariyê ye. Dostanî hilweşandina pergala zordestî û desthilatdariyê ye. Dostanî xweşikbûn, bedewbûn û pevşabûn e. Dostanî azadbûn, sarezbûn û mirovbûn e.

Dijminayî, nûnertiya xedarî, serhişkî û dilhişkî ye. Dijminayî, navgîna rûreşî, bextreşî û zikreşiyê ye. Dijminayî, nexweşiyê, ebareta xurifîn û bêhişiyê ye. Dijminayî, şan û hêmaya rûreşiyê ye. Dijminayî, banga bêbextî û qaleşiyê ye. Dijminayî, berbanga bextreşiyê ye. Dijminayî, heyf û tola kevneperestiya raboriyê ye. Dijminayî, kujera nûjeniya diwaroja komelayetiyê ye. Dijminayî, dost û yarê mirovkujiyê, dijmin û neyarê mirovhezîyê ye. Dijminayî rûxandin, xerakirin û wêrankirin e. Dijminayî mandekirin, astengkirin û tunekirin e. Dijminayî fitnebazî, şerxwazî û darazî ye. Dijminayî xwekijî, hevkujî û komkujî ye. Dijminayî şikdarî, sawdarî û tundwarî ye. Dijminayî xwînsarî, xemsarî, sersarî ye. Dijminayî, jan, azar û bêzarî ye.

Bêwefatiya mirovatiyê ya herî bêsiûd û bêsiûd, parastina dijminahiyê ye. Dijminahiya ku di her dem û domanên dîrokî de derfet û eman nedaye dostaniya rastî. Şer û pevçûnên dîrokî yên bêdeman her gav tov û bizrên kerb û kînê reşandine ser erdzemînê dinê. Kîndariyên kerbdar û rikindar tu car xwe ji pêxêla mirovahiyê bernedaye. Ji ber wê ye ku di tu deman de mirov û mirovahî bê dijmin û neyar, bê şer û pevçûn nemaye.

Dostanî û dijminayî, wekî ku li jorê jî hate diyarkirin, du kirûyên dijber û rikber ên gerdûnî ne. Herdu tégî jî hebûna xwe ya dijber, her gav li nik hev, digel hev û li ber hev dikudînin. Hebûna yekê girêdayî tunebûna ya din e. Ji bo ku kerb û kîna dijminahiyê jî holê raebe, divê hesret û hezkirina dostaniyê bi hemû azweriya xwe di dil û hinavên mirov de zîl bide û şax berde.

Kaniya Helbestan

## Diyarî gunehên xwe bike



### Şepal Hêvo

Ew ê han, yê bejin şikestî  
Dema şev bi ser de dikeve  
Mestbûn.. polî poşman, min şiyar dike  
Radibim...  
Neqûşkekê ji wêneya xweyî çilmisî  
didim  
Û ji ba re, na ne ji ba re  
Pêre nimêja tenêtiyê dikim  
Û fatîheyekê ji sêwlekan re digurînim

Li bîra min e  
Ku av ji neçarî diherike  
Û kufriyên dîl, li mafê xwe digerin.  
Hê jî tiliyên min  
Tama pênuşê nekirine,  
Carna weke zarokekî  
Xwe şêrîn dikin  
Û carna, mîna qehbekê  
Min dixapînin,  
Lê ji wan pir hez dikim.  
Awrên te...  
Mîna mirîşkên malê,  
Nikila li dilê min didin.  
weke pelê çixareyên qaçax  
Zû dişewitim,  
Û di xwefidanka helbestvanekî kor  
de,  
Bînberdana teyî şermok, min birînpêç  
dike.  
Ji kîjan dergehî xwe vekim?  
Ta ji hilma gazinên teyî bêser û ber  
riha bibim.  
Erê...  
Yên ku li ser qeşayê tembîniyên xwe  
dinvîsînin  
Dayîka wan dayîka min e,  
Yên pîxwas, dema li ber dîwarê  
helbestê,  
Mîxên azdaiyê dikutin,  
Ew deşt jiyana xwe ji dest dide.  
Ew ê han, dema peyalekê ji giriyê min  
dinoşe  
Agir bi konê gotinan dikeve  
Mala hevokê xira dibe  
Û tu li min napirsî.

Avestakurd

## Zimanê Me Nasnameya Me Ye

Beşa 1



Mecîd Cinîkanlo

Zimanê Kurdî yek ji simbolên herî xurt û li rastî de hêma û faktera hebûna neteweya me ye. Ziman wek nasnameya mirovan tê hesêbandin û mirovên ku bi zimanê xwe axaftinê nekin, ev

mirovên bê nasname tînen hesabandin. Neteweya Kurd serbarê asimilasyonê bilez ya dujminên me bi hemû awayekê ji zimanê xwe berevanî kiriye û dayk û bavên Kurd bi rihekî kurdewarî zarokên xwe bi zimanê Kurdî perwerde kirine. Yek ji pîvanên sereke yên netewebûnê, zimanê vê netewê ye. Ziman nîşaneya hebûna neteweyekê tê hesabandin, lewra Saziya Neteweyên Yekbûyî, roja 21ê February, wek roja cîhanîya zimanê dayîkê bi nav kiriye. Di vê rojê de NY bi birêvebirina civn û rê û resman, li gellek ji welatên cîhanê, rêz ji zimanê dayîkê yê neteweyên curbicur digre û daxwazê ji welatên dinê dike ku mafê xwendin û nivîsandina bi zimanê dayîkê, ji bo kêma neteweyên akincî li welatê wan de, li berçav bihê girtin. NY herweha texmîn dike ku 40% ji zimanên cîhanê seba guhnedana rayedaran û herweha siyaseta asimilasyonê ji nav herin, û bi vî awayî mirovatî yek ji girîngtirîn amrazê têgihîştinê, yanî nasnameya tev mirovatiyê ji dest bidin.

Neteweya Kurd wek yek ji neteweyên herî kevnar li Rojhilata Navîn, tê naskirin û zimanê Kurdî pêka praniya çavkaniyên li berdest de, yek ji zimanên herî kevnar ên cîhanê ye, ku mirovan bi vî zimanî axaftin kirine. Li gorî lêkolînên li berdest de zimanê Kurdî çîçek ji zimanê Hind û Ewropî ye ku li hinek ji cihên Rojhilata Navîn û bi taybetî li Kurdistanê bi vî zimanî, neteweyek 40 milyonî axaftinê dike. Zimanê Kurdî li 5 zarawayên, Kurmancî, Soranî, Hewramî, Zazakî û Lorî pêk tê. Piraniya zana û vekoleran li ser vê baweriyê ne ku zimanê Kurdî li rastî de her zimanê qewmê madan e, û seba derbazbûna dem, hinek guherîn li vî zimanî de pêk hatine. Profosor N.Mekinzî û Wiladimir Mînoroskî di vê derheqê de dibêjin: Eger neteweya Kurd li paşmayiyên Madan nebin, gelo çî belayek hatiye serê neteweyek bihêz wek Madan ku li cîhana kevnar de, wisa bihêz bûne? û ev hemû Kurdên ku bi zimanekî Îranî, lê cuda ji hemû Îraniyan dipeyvin, li ku hatine?!

Herweha zana û rojhilatnasê navdar ê Elmanî li ser vê baweriyê ye ku eger rojekê lêkolînê micid li ser zimanê Kurdî bihêz kirin, bê şik û guman zimanê Kurdî wek zimanekî herî kevnar dê bihête naskirin.

Eger em wek neteweya Kurd li dîroka xwe binêrin bo me êşkera dibe ku zimanê Kurdî li rastî de her zimanê Evêstaya Zerdestê kal e. Nêzî 20 salî berî niha li herêma Hewramana rojhilatê Kurdistanê li işkevtekî herî kevnar de, hin belgeyên dîrokî li ser Evêstayê hatin dîtin, ku piraniya wan belgeyan hin nivîsên Evêstayê bûn ku li ser çermê Ga hatibûn nivîsandin û piraniya wan bi zimanê Kurdî bûn. Lê mixabin ev belgeyên dîrokî ku parek mezin li pirsyarên dîrokan bersiv didan, ji aliyê desthilata Komara Îslamî a Îranê ve,

hatin binçavkirin û mixabin heta îro rojê nekevtine ber destê zana û pisporên zimannasî û dîrokanan. Lê ya ku îro û pêka belge û dukumentên dîrokî li ber dest dane, Evêsta pirtûka pîroz ya zerdestiyên bi qasekî zor bi zimanê Kurdî hatiye nivîsandin.

Îro rojê û serbarê tekoşina NY, Kurd wek neteweyek xwedî dîrok û zimanê taybet bi xwe, û xaka hevbeş, ji aliyê dagîrker ên xaka Kurdistanê bi hemû awayî tê tepeserkirin û hakimên dagîrkarên xaka Kurdistanê bi hemû awayekî li hewla jinavbirina neteweya Kurd in. Rejîmên dagîrkar ên Kurdistanê ji bilî siyaseta komkujîya Kurdan, bi siyaseta asimilasyonê dixwazin ku neteweya Kurd ji nav bibin. Li Tirkîyê nêzî 80'ê salî, rejîma Kemalîst a Tirkîyê axaftin bi zimanê Kurdî qedexa kir û neteweya Kurd bi hemû awayekê ji aliyê dezgeha ragehandina turkan ve dihat înkarkirin û axaftin bi zimanê Kurdî tawan dihat hesabandin. Li başurê Kurdistanê zarawayê Kurmancî bi hemû awayekê dihat înkarkirin, û axaftina bi vî zarawayî tawanekî mezin bû, ku li jêr bandora rejîma Kemalîstan ev siyaseta qirêj dihat meşandin.

Li Kurdistanê sûriyê Kurd ji hemû mafên mirovî hatine bêparkirin û ev siyaseta heta îro rojê tê meşandin. Kurd li sûriyê serbarê vê yekê ku bê nasname ne, dîsan bi tu awayekê hebûna Kurdan nayê qebulkirin û zimanê Kurdî li bin gefên desthilatdarên sûriyê de tete înkarkirin.


Li rojhilatê Kurdistanê asimilasyonê ser zimanê Kurdî bi berdehamî dihat meşandin. Li rejîma Pehlewî de, Kurd wek parek ji neteweya Fars, û zimanê Kurdî jî wek devokê ji zimanê Farsî dihat hesabandin. Herweha rejîma han bi belgeyên nerast wek pirtûka Reşîd Yasemenî, Kurd wek parek ji neteweya Fars didan xuyakirin û li hin herêmên wek Xurasanê ku Kurd li wir dijîn, bi Kurdan re dihat gotin ku hûn Kurmanc in, û zimanê we Kurdî nine. Piştî têkçûna rejîma Pehlewî û hatine serkar a rejîma Xumeynî, serbarê cehd û xebata Kurdan, Kurd ketine ber siyastek herî xurt ya asimilasyonê, û siyaseta bi fars kirina Kurdan ji aliyê dewleta melayan ve bi awayekî sistematîk tê meşandin.

Pêka siyaseta melayan, li rûyekî de neteweyên niştocih li Îranê, hemû birayê yektir in û olê Îslamê hemûyan wek yek temaşê dike!! Lê di kiryar de newisa ye.

Her wek em li dîroka Afrîqayê binêrin, berî êrişê Ereban bo ser Afrîqayê li welatên bakurê Afrîqayê, ziman û çandekî din hebûye ku bi erîşê Ereban ev çand bi tevahî asimilê bûye, û îro rojê ev wek Ereban tînen hesabandin!!

Li rastî de siyaseta melayên deselatdar li Îranê wek siyaseta wan desthilatdarên Ereban ê ku dijberî serbestiya zimanan in, bi bandor bûye û sed heyf û mixabin hinek Kurdistanî bi zarokên xwe re bi zimanê Farsî axaftinê dikin. Ragehandin û medyaya Komara Îslamî a Îranê bi awayekî micid û li ser siyasetekî darêjayî dest bi weşana programan bi zimanê Farsî kirin û weha didin zanîn ku axaftina bi zimanê Kurdî nîşaneya paremayîn û axaftina bi zimanê Farsî nîşaneya pêşkevîtinê ye. Ev siyaseta qirêj bi hemû awayekê û bi taybetî li debistan û zanîngehan de bi awayekî sistematîk tê meşandin.

## Belge fîlmek Spanî Li Ser Kurdên Sûriyê



Belgefîlmek Spanî "Un Pueblo Invisible" anku "miletêkî ne xuya" rewşa penaberên Kurd vedibêje. Malbata Selaheddin Bilo, di sala 2006'an de ji bajarê Qamişlo reviyabû û berê xwe dabû Herêma Kurdistanê.

Malbata Selaheddin yek ji qurbanên serjimêriya awarte ya sala 1962'an e, ku bi deh hezaran malbatên Kurd li başûrê rojavayê Kurdistanê ji nasnameyên xwe hatin bêparkirin, ew li Sûriyê wek "Kurdên bênasname" tînen naskirin." Rojnamegerê Bask Karlos Zurutuza di nûçeyê de dibêje, "Me xwest bi riya vê belgefilmê em ronahiyê bidin ser rewşa trajîk ya gelê Kurd yê ku di bin zordariya rejîma Şamê de dimîne".

Derbarê xebata derhênerê belgefilmê de, wiha hatiye gotin, "Derhênerê film Karlos Zurutuza, gelek gotar û roportaj li ser Kurdên rojavayê Kurdistanê di media Spanî de weşadibû. Heman roportaj ji bo gelek zimanan hatibûn wergerandin: Holandî, Danîmarkî, Ingilîzî û Almanî. Karlos xwest xebata xwe ya nivîskî bi deng û wêne jî biweşîne, lê ji ber negengaziya kişandina filmekî li Suriyê li ser pirsê Kurdî, Karlos berê xwe dabû kampa Moqabilî ya li parêzgeha Duhokê, cihê ku penaberên Kurdên Sûriyê lê bi cih dibin."

Hêjayî gotinê ye, belgefilma her du rojnamegerên Bask, Borja Portuondo û Karlos Zurutuza, di meha gulana borî de li festîvala bi prestîj ya Belgefîlmên Mafên Mirovan Cinestrat li bajarê Valencia hatibû nîşandan. Belgefîlm bi Kurdî ye û 7 xulekan li ber xwe dide.

AKnews



## "Sedam" Navê Hespê Herî Giran Yê Xezeyê

Xwediyê Hespê herî baş û  
binirx yê Xezê, navê Hespê  
xwe daniye Sedam.

Li gor rapora "parsîne",  
"Meimon Xoznî" xwediyê wî  
Hespê binirx dibêje: Sedam  
nahê sekinandin. Tu hespek  
Erebî bi rewşa wî re nagihîje,  
ew dînê bezê ye, ji ber  
şanazîkirin bi Sedam, piştî  
bidarvekirina wî, min navê  
Hespê xwe yê herî baş kire



Sedam!

Hêjayê gotinê ye ku Serkomarê berê yê Îraqê (Sedam Husên),  
xwediyê rûmetek mezin di nava Filistîniyên akinciyê Xezê û bi  
Xasmanî endamên Hemasê de ye.

## Vegera Ser Ola Zerdeşt Li Îranê!!!

Di demên dawîn  
de hîmayên Zerdeştî  
yên wek milvan û  
wêne di nav gelek  
Îraniyan de bûye  
moda. Gelek kes  
wêne û milvanên  
Zerdeşt bi xwe re  
dikin û deq û



gotinên Zerdeştî li rûpelên lênûs û rojnameyên xwe dinivîsinin û  
di axaftinên xwe de jî amaje bi gotinên Zerdeştî dikin.

Ev diyarde zêdetir di nav xwendevanên zanîngêhê de berbilave,  
ku hinek ji wan hez dikin hêviyên xwe yê rastîn li ser vegera  
dînê bapîrên xwe naveşêrin.

Ew mirovên han li ser vê baverêne û dibêjin:

Hizra baş, gotinên baş û kiryarên baş, eger em vê gotinê bi cî  
bînîn, çî pêwîstiya me namîne ku em biçin nav hûrdekrîyên  
ayînekî din. Em dikarin pêwendiyekî dirust û rastîn bi nûxwazî û  
pêşkeftinê ve girê bidin.

Dergush.com

## Xox û Faydeyên Wê Bo Leşê Mirov

Xox di hunera cîhanê  
de, sembola jiyana dirêj  
e. Xox ji aliyê Vîtamînên  
B, C û ji aliyê  
Potasyûmê de  
dewlemende.

Pispor feydeyên Xoxê  
bi awayê jêrîn rêz dikin.  
ji bo Gurçikan baş e û



kevîrê Gurçîk dihêline. Bêhna devê mirov kêmtir dike. Kurmên  
roviyê mirov dike. Xwînê paqij dike. Rîska krîza dilê mirov kêmtir  
dike. Qebiz bûna însan jinav dibe. Kelijîn û herareta leşê mirov  
kêmtir dike. Westabûnê kêmtir dike. Ji bo bêxewiyê baş e û Çermê  
mirov ji jîndar dike.

Hawar.net

## Encamên rapirsîyek Cîhanî:

### Belê bo Êrîşa Leşkirî li dijî Îranê

Li gor rapirsîyekî  
cîhanî a Saziya  
Vekolînî a Piyo li  
Amerîkayê, ku di 7'ê  
Avrîlê heya 8'ê May bi  
beşdariya 24 Hezar  
kesan li 22 welatên  
mezin ên cîhanê de  
hat encamdayîn,



Piraniya xelkê di beşek ji welatên Rojava û hin ji welatên Îslamî,  
daxwazkar in ku êrîşa leşkirî dijî Komara Îslamî a Îranê bona  
pêşgirtin ji destveanîna çekên Etomî bihê encamdayîn.

Ji aliyekî din ve jî Sînatôr Lîbrmen, yek ji endamên paye  
biline Senaya Amerîkayê di konfiranseki çapemeniyê de  
ragehand ku ew durpêçên ku di Kongireya Amerîkayê de hatin  
pesend kirin, gelek bihêz û xwedî bandor in û eva şansê herî  
dawîn yê Komara Îslamî a Îranê ye berî êrîşa leşkirî. Lê bi  
berçavgirtina van rapor û nûçeyan, mirov digîje vê encamê ku  
êdî cîhan jî li rejîmê bêhêvî bûye û bas ji êrîşa nizamî bo ser wî  
welatî, bûye rojev û nîqaşek micid di nava raya giştî de.

## Xeyal Bû Rastî

Firandina  
tirimbêlan xeyalek  
bû. Lê mihendisên  
kevn yê NASA yê  
ew xeyal kirin rastî û  
tirimbêl firandin.

Tirimbêla bi navê



"Terrafuîya tranition" hat testkirin û ket firînê. Li gor ku şirketa  
"Terrafuîyin" ragihandiye, tirimbêl xwedî hêzek 100 Beygîr e û di  
seetê de 180 Kîlometro difire. Bi debeyek Benzîn yan Mazotê wê  
heta 750 kîlometroyî jî karibe bifire.

Şirketa "Terrafuîyin" dibêje ku ji niha de dewlemend ketine dora  
kirîna tirimbêlê û 40 tirimbêl hatine xwestin.

Dergush.com

## Koma Dostaniya PE û Kurd Hate Avakirin

Li bajarê Strasburga  
Fransayê, Koma Dostaniya  
Kurd û Parlamentoya  
Ewropayê hate  
damezirandin.  
Ev demek dirêj e ku Kurdên  
derweyî welêt hewil didan ku  
pirsa Kurd bidin nasîn. Hate  
ragihandin ku ji 10 endamên



cuda yê Yekîtiya Ewropayê, zêdetirî 15 Parlamenterên PE' yê û  
Şêvirmendên wan beşdarî civîna avakirinê bûn.

Bi vî awayî yekemîn Koma Dostaniya PE'yê û Kurdan piştî  
hîlbiartina dawîn a PE'yê, hate avakirin. Koma dostaniyê wê di  
dema betaliya Havînê de û di mehên Payîzê li Parlamentoya  
Ewropayê de konfiransa Kurd lidar bixin.